

رسالة في القلب

توفيق الحكيم





المستخرج المتنوع

توفيق الحكيم

رصاصتي في القلوب

ثلاثة فصول

١٩٣١

الناشر
مكتبة مصر
٣ شارع كامل صدقي - النجيلة

دار مطبوعات للطباعة
سعيد جودة السبحان وشركاه



كتب للمؤلف نشرت باللغة العربية

- ١ — محمد عليه السلام (سيرة حوارية) ١٩٣٦
- ٢ — عودة الروح (رواية) ١٩٣٣
- ٣ — أهل الكهف (مسرحية) ١٩٣٣
- ٤ — شهر زاد (مسرحية) ١٩٣٤
- ٥ — يوميات نائب في الأرياف (رواية) ١٩٣٧
- ٦ — عصفور من الشرق (رواية) ١٩٣٨
- ٧ — تحت شمس الفكر (مقالات) ١٩٣٨
- ٨ — أسعبد (رواية) ١٩٣٨
- ٩ — عهد الشيطان (قصص فلسفية) ١٩٣٨
- ١٠ — حمارى قال لى (مقالات) ١٩٣٨
- ١١ — اراكسا أو مشكلة الحكم (مسرحية) ١٩٣٩
- ١٢ — راقصة المعبد (روايات قصيرة) ١٩٣٩
- ١٣ — نشيد الأنشاد (كما فى التوراة) ١٩٤٠
- ١٤ — حمار الحكيم (رواية) ١٩٤٠
- ١٥ — سلطان الظلام (قصص سياسية) ١٩٤١
- ١٦ — من البرج العاجى (مقالات قصيرة) ١٩٤١
- ١٧ — تحت المصباح الأخضر (مقالات) ١٩٤٢
- ١٨ — بجماليون (مسرحية) ١٩٤٢
- ١٩ — سليمان الحكيم (مسرحية) ١٩٤٣
- ٢٠ — زهرة العمر (سيرة ذاتية — رسائل) ١٩٤٣
- ٢١ — الرباط المقدس (رواية) ١٩٤٤

- ٢٢ — شجرة الحكم (صور سياسية) ١٩٤٥
- ٢٣ — الملك أوديب (مسرحية) ١٩٤٩
- ٢٤ — مسرح المجتمع (٢١ مسرحية) ١٩٥٠
- ٢٥ — فن الأدب (مقالات) ١٩٥٢
- ٢٦ — عدالة وفن (قصص) ١٩٥٣
- ٢٧ — أرني الله (قصص فلسفية) ١٩٥٣
- ٢٨ — عصا الحكيم (خطرات حوارية) ١٩٥٤
- ٢٩ — تأملات في السياسة (فكر) ١٩٥٤
- ٣٠ — الأيدي الناعمة (مسرحية) ١٩٥٩
- ٣١ — التعادلية (فكر) ١٩٥٥
- ٣٢ — إنزيس (مسرحية) ١٩٥٥
- ٣٣ — الصفقة (مسرحية) ١٩٥٦
- ٣٤ — المسرح المتنوع (٢١ مسرحية) ١٩٥٦
- ٣٥ — لعبة الموت (مسرحية) ١٩٥٧
- ٣٦ — أشواك السلام (مسرحية) ١٩٥٧
- ٣٧ — رحلة إلى الغد (مسرحية تنبؤية) ١٩٥٧
- ٣٨ — السلطان الحائر (مسرحية) ١٩٦٠
- ٣٩ — ياطالع الشجرة (مسرحية) ١٩٦٢
- ٤٠ — الطعام لكل فم (مسرحية) ١٩٦٣
- ٤١ — رحلة الربيع والخريف (شعر) ١٩٦٤
- ٤٢ — سجن العمر (سيرة ذاتية) ١٩٦٤
- ٤٣ — شمس النهار (مسرحية) ١٩٦٥

- ٤٤ — مصير صرصار (مسرحية) ١٩٦٦
٤٥ — الورطة (مسرحية) ١٩٦٦
٤٦ — ليلة الزفاف (قصص قصيرة) ١٩٦٦
٤٧ — قالبنا المسرحي (دراسة) ١٩٦٧
٤٨ — بنك القلق (رواية مسرحية) ١٩٦٧
٤٩ — مجلس العدل (مسرحيات قصيرة) ١٩٧٢
٥٠ — رحلة بين عصرين (ذكريات) ١٩٧٢
٥١ — حديث مع الكوكب (حوار فلسفي) ١٩٧٤
٥٢ — الدنيا رواية هزلية (مسرحية) ١٩٧٤
٥٣ — عودة الوعي (ذكريات سياسية) ١٩٧٤
٥٤ — في طريق عودة الوعي (ذكريات سياسية) ١٩٧٥
٥٥ — الحمير (مسرحية) ١٩٧٥
٥٦ — ثورة الشباب (مقالات) ١٩٧٥
٥٧ — بين الفكر والفن (مقالات) ١٩٧٦
٥٨ — أدب الحياة (مقالات) ١٩٧٦
٥٩ — مختار تفسير القرطبي (مختار التفسير) ١٩٧٧
٦٠ — تحديات سنة ٢٠٠٠ (مقالات) ١٩٨٠
٦١ — ملاح داخلية (حوار مع المؤلف) ١٩٨٢
٦٢ — التعاادلة مع الإسلام والتعادلية (فكر فلسفي) ١٩٨٣
٦٣ — الأحاديث الأربعة (فكر ديني) ١٩٨٣
٦٤ — مصر بين عهدين (ذكريات) ١٩٨٣
٦٥ — شجرة الحكم السياسي (١٩١٩ — ١٩٧٩) ١٩٨٥

كتب للمؤلف نشرت في لغة أجنبية

شهر زاد : ترجم ونشر في باريس عام ١٩٣٦ بمقدمة لجورج لكونت
عضو الأكاديمية الفرنسية في دار نشر (نوفيل أديسيون لاتين) وترجم إلى
الإنجليزية في دار النشر (بيلوت) بلندن ثم في دار النشر (كروان)
بنيويورك في عام ١٩٤٥ . وبأمريكا دار نشر (ثرى كتننتزا بريس)
واشنطن ١٩٨١ .

عودة الروح : ترجم ونشر بالروسية في ليننجراد عام ١٩٢٥
وبالفرنسية في باريس عام ١٩٣٧ في دار (فاسكيل) للنشر وبالإنجليزية
في واشنطن ١٩٨٤ .

يوميات نائب في الأرياف : ترجم ونشر بالفرنسية عام ١٩٣٩
(طبعة أولى) وفي عام ١٩٤٢ (طبعة ثانية) وفي عام ١٩٧٤ و ١٩٧٨
(طبعة ثالثة ورابعة وخامسة بدار بلون بباريس) وترجم ونشر بالعبرية
عام ١٩٤٥ وترجم ونشر باللغة الإنجليزية في دار (هارفيل) للنشر بلندن
عام ١٩٤٧ — ترجمة أبا إيمان — ترجم إلى الأسبانية في مدريد عام ١٩٤٨
وترجم ونشر في السويد عام ١٩٥٥ ، وترجم ونشر بالألمانية عام ١٩٦١
وبالرومانية عام ١٩٦٢ وبالروسية عام ١٩٦١ .

أهل الكهف : ترجم ونشر بالفرنسية عام ١٩٤٠ بتمهيد تاريخي
لجامستون فييت الأستاذ بالكوليج دي فرانس ثم ترجم إلى الإيطالية بروما
عام ١٩٤٥ وبميلانو عام ١٩٦٢ وبالأسبانية في مدريد عام ١٩٤٦ .
عصفور من الشرق : ترجم ونشر بالفرنسية عام ١٩٤٦ طبعة أولى ،

- ونشر طبعة ثانية في باريس عام ١٩٦٠ .
عدالة وفن : ترجم ونشر بالفرنسية في باريس بعنوان (مذكرات
قضائي شاعر) عام ١٩٦١ .
بجماليون : ترجم ونشر بالفرنسية في باريس عام ١٩٥٠ .
الملك أوديب : ترجم ونشر بالفرنسية في باريس عام ١٩٥٠ ،
وبالإنجليزية في أمريكا بدار نشر (ثري كنتستز بريس)
بواشنطن ١٩٨١ .
سليمان الحكيم : ترجم ونشر بالفرنسية في باريس عام ١٩٥٠
وبالإنجليزية في أمريكا بدار نشر (كنتستز بريس) بواشنطن ١٩٨١ .
نهر الجنون : ترجم ونشر بالفرنسية في باريس عام ١٩٥٠ .
عرف كيف يموت : ترجم ونشر بالفرنسية في باريس عام ١٩٥٠ .
المخرج : ترجم ونشر بالفرنسية في باريس عام ١٩٥٠ .
بيت العمل : ترجم ونشر بالفرنسية في باريس عام ١٩٥٠ .
وبالإيطالية في روما عام ١٩٦٢ .
الزمار : ترجم ونشر بالفرنسية في باريس عام ١٩٥٠ .
براكسا أو مشكلة الحكم : ترجم ونشر بالفرنسية في باريس
عام ١٩٥٠ .
السياسة والسلام : ترجم ونشر بالفرنسية في باريس عام ١٩٥٠ .
وبالإنجليزية في أمريكا بدار نشر (ثري كنتستز بريس)
بواشنطن ١٩٨١ .
شمس النهار : ترجم ونشر بالإنجليزية في أمريكا (ثري كنتستز)
واشنطن عام ١٩٨١ .
صلاة الملائكة : ترجم ونشر بالإنجليزية في أمريكا (ثري كنتستز)
واشنطن عام ١٩٨١ .

- الطعام لكل فم : ترجم ونشر بالإنجليزية في أمريكا (ثرى كنتنتز)
واشنطن عام ١٩٨١ .
- الأيدي الناعمة : ترجم ونشر بالإنجليزية في أمريكا (ثرى كنتنتز)
واشنطن عام ١٩٨١ .
- شاعر على القمر : ترجم ونشر بالإنجليزية في أمريكا (ثرى كنتنتز)
واشنطن عام ١٩٨١ .
- الورطة : ترجم ونشر بالإنجليزية في أمريكا (ثرى كنتنتز) واشنطن
عام ١٩٨١ .
- الشيطان في خطر : ترجم بالفرنسية في باريس عام ١٩٥٠ .
- بين يوم وليلة : ترجم ونشر بالفرنسية في باريس عام ١٩٥٠
وبالأسبانية في مدريد عام ١٩٦٣ .
- العش الهادئ : ترجم بالفرنسية في باريس عام ١٩٥٤ .
- أريد أن أقتل : ترجم ونشر بالفرنسية في باريس عام ١٩٥٤ .
- الساحرة : ترجم ونشر بالفرنسية في باريس عام ١٩٥٣ .
- دقت الساعة : ترجم ونشر بالفرنسية في باريس عام ١٩٥٤ .
- أنشودة الموت : ترجم ونشر بالإنجليزية في لندن هاينان عام ١٩٧٣
وبالأسبانية في مدريد عام ١٩٥٣ .
- لو عرف الشباب : ترجم ونشر بالفرنسية في باريس عام ١٩٥٤ .
- الكنز : ترجم ونشر بالفرنسية في باريس عام ١٩٥٤ .
- رحلة إلى الغد : ترجم ونشر بالفرنسية في باريس عام ١٩٦٠ .
- وبالإنجليزية في أمريكا بدار نشر (ثرى كنتنتز بريس) بواشنطن عام
١٩٨١ .
- الموت والحب : ترجم ونشر بالفرنسية في باريس عام ١٩٦٠ .
- السلطان الحائر : ترجم ونشر بالإنجليزية لندن هاينان عام ١٩٧٣ .

- وبالإيطالية في روما عام ١٩٦٤ .
- يا طالع الشجرة : ترجمة دنيس جونسون دافيز ونشر بالإنجليزية في لندن عام ١٩٦٦ في دار نشر أكسفورد يونيفرستي پريس (الترجمات الفرنسية عن دار نشر « نوفيل إيديسيون لاتين » بباريس) .
- مصير صرصار : ترجمة دنيس جونسون دافيز عام ١٩٧٣ .
- مع : كل شيء في مكانه .
- السلطان الخائر .
- نشيد الموت .
- لنفس المترجم عن دار نشر هاينمان — لندن .
- الشهيد : ترجمة داود بشاي (بالإنجليزية) جمع محمود المنزلاوى تحت عنوان « أدبنا اليوم » مطبوعات الجامعة الأمريكية بالقاهرة — ١٩٦٨ .
- محمد ^{صلى الله عليه وسلم} : ترجمة د . إبراهيم الموجي ١٩٦٤ (بالإنجليزية) نشر المجلس الأعلى للشئون الإسلامية . طبعة ثانية مكتبة الآداب ١٩٨٣ .
- المرأة التي غلبت الشيطان : ترجمة تويليت إلى الألمانية عام ١٩٧٦ ونشر روتن ولوننج ببولين .
- عودة الوعي : ترجمة إنجليزية عام ١٩٧٩ لبيل وندر ونشر دار ماكملان — لندن .



الفصل الأول

(عيادة طيب.. مكتب الدكتور.. حجرة لها بابان.. الدكتور سامى يخلع على عجل المعطف الأبيض، ويرتب هندامه الخارجى بعناية، بعد أن ينظر فى ساعة ذهبية فى معصمه.. ويتأهب للخروج.. جرس التليفون يدق فوق المكتب...)

سامى : (يجرى على صوت جرس التليفون) ألو .. أنا الدكتور سامى نفسه ، مين ؟... أهلا وسهلا .. حاضر يا فندم .. عنوان البيت شارع القصر العينى .. بعد ساعه أكون عندكم .. قبل كده مشغول .. بس نخليه ياخذ مسهل .. (يفتح أحد البابين وهو يصفر بفمه مبتهجا فيصطدم بشخص حسن الهندام داخل فى هياج واضطراب) بسم الله الرحمن الرحيم !.. جرى إيه ؟.. مالك يا نجيب ؟..

نجيب : (وهو يلهث يرتقى على أقرب مقعد) اسكت.. أنا

توفيت !..

سامى : حد قابلك من اياهم .. قلت لك ألف مره اقصر الشر
وابعد عن الشوارع اللى بيطلعوا لك فيها أصحاب
الديون بالنهار !

نجيب : (فى صوت متداع وهو مغمض العينين) مش
ديون ..

سامى : آمال إيه الحكايه .. مالك ؟ ما تضيعش وقتى .. أنا
لازم أقابل خطيتى حالا .. (ينظر فى ساعته) ..

نجيب : ابعت حالا هات لى واحد حكيم ..

سامى : وأنا يعنى امال هنا طرطور ؟..

نجيب : (ممدداً على المقعد) آه يانى .. رحى خلاص مأسوفا
على شبانى !..

سامى : اسمع يا نجيب .. إن كان غرضك تتسليط علشان عايز

لك ريال أو نص ريال قل لى بلاش ضياع وقت ..

نجيب : مش مسألة فلوس .. بقول لحضرتك أنا ميت .. هو

يعنى علشان ما اكون ميت لازم يدفنونى فى قراقة
المجاورين ؟..

سامى : والكلام المفيد دلوقت إيه بقا ؟..

- نجيب : الكلام المفيد انى أنا دلوقت مضروب بالرصاص ..
سامى : (فى استغراب) رصاص ؟ ...
نجيب : انضربت بالرصاص قدام « جرونى » ..
سامى : يا خبر ا.. بتقول إيه ؟ .. جد يا نجيب ؟ .. وساكت
ليه من الصبح ؟ .. فين ؟ .. (ينادى) يا عوضين ا..
التمرجى مش هنا .. انت لازم لك إسعاف حالا ..
نجيب : أيوه اسعفى ..
سامى : (يدنو منه ويخلع ملابسه) اكشف الجرح بسرعة ..
دخلت فين الرصاصة ؟ ..
نجيب : (يشير إلى قلبه) هنا ا..
سامى : (فى دهشة) مش ممكن ا..
نجيب : (يشير إلى قلبه بشدة) بقول لك هنا ..
سامى : مش معقول .. انت يظهر ما عندكش فكره عن
الطب بالمره ..
نجيب : ماليش دعوى بالطب .. أنا بصفتى مضروب
رصاصه أقول لك انها واقفه هنا .. وانت حر تصدق
والا ما تصدقش ..
سامى : دا القلب يا مغفل .. رصاصه فى القلب ولسه

عايش ؟ .. انت عايز تطير من عقلى حبة الطيب اللى
باكل بهم عيش ! ..

نجيب : ومين قال لك انى لسه عايش ؟ ...

سامى : بتقول إيه ؟ ..

نجيب : بلغ عن وفاتى حالا بصفتك حكيم ! ..

سامى : لازم الرصاصه دخلت فى عقلك ! ..

نجيب : الرصاصه هنا فى القلب ..

سامى : (يحس نبض نجيب) مفيش حاجه أبداً عندك .. نقطة

دم مفيش .. النبض طبيعى .. القلب سليم ..

نجيب : القلب سليم .. سليم يا جاهل .. افحصنى كويس ..

انت شايفنى نجيب بتاع الصبح ؟ .. أنا شخص آخر

يا سامى من مدة ٧ دقائق ... أنا فى عالم آخر من مدة

٧ دقائق ...

سامى : (ينظر إلى نجيب لحظة) انت بتحب ! ..

نجيب : لأول مره فى حياتى ..

سامى : كل نوبه تقول دى أول مره فى حياتك ..

نجيب : أبداً .. المره دى بس .. لأن الرصاصه هنا ..

سامى : رصاصه إيه ! ..

نجيب : عينها يا سامى !.. نظره واحده مافيش غيرها !..
عينينا تقابلت عفواً !.. خلاص .. شعرت فى الحال
بحاجه دخلت هنا .. (يشير إلى قلبه) ولا طلعتش ..
لسه موجوده .. هات إيدك .. (يمسك يد سامى)
شوف .. جس ...

سامى : (يجذب يده) مين دى ؟.. ما عرفتهاش ؟..
نجيب : أبداً .. كانت راكبه أتوموبيل طول الأوده دى مره
ونص .. وواقفه قدام جرونى تاكل « جلاس » ..
سامى : وانت كنت فين ؟..

نجيب : كنت باخد واحد ويسكى على البار .. واحد بس
« أبير ثيف » مفيش غيره .. وانا خارج لقيت عينها
فى عينى راح قلبى عامل كده .. (يقبض يده) وراح
ساقط تحت رجلى واتدحرج فى الشارع على
الأسفلت ..

سامى : لغاية ما وقع فى بلاعه !..
نجيب : ما اعرفش راح فين ..
سامى : وبعدين ؟..
نجيب : وبعدين شفتها نزلت ومشيت فى شارع المناخ فى اتجاه

الأوبرا ..

سامى : مشيت وراها طبعا ..

نجيب : انت مجنون ! .. وانا اقدر امشى فى شارع المناخ ؟ ..

عايز يقفشونى قدامها وابات الليلة فى القسم ؟ ..

سامى : أبوه صحيح .. دا من الشوارع الممنوعه .. مش

واخذ بالى .. لك فيه على الأقل ثلاث زباين من

اياهم .. كوستا الترزى ، وشالوم الجزجى ، وماريو

الحلاق ..

نجيب : (فى حق) مسألة الشوارع دى حاجه تجنن .. أروح

فين يا ناس ؟ .. مفيش شوارع كفايه فى مصر .. إن

ما كنش مصلحة التنظيم تفتح حالا شوارع جديده

والا يعملوا مترو تحت الأرض أو ترمواى فى السما ..

اللهم أنا خلاص ما ليش عيش فى البلد ..

سامى : (باسم) انت ممنوع من المرور فى كام شارع ؟ ..

نجيب : (ناظرا فى أجدته) أقول لك يا سيدى : خد عندك

المدابغ لغاية النص ، وقصر النيل بعد سليمان باشا ،

والمناخ جزء منه ، وبعض شارع قواد وشارع كوبرى

قصر النيل .. وأما الضواحي فصاحب الملك ساكن

- في الزيتون ..
- سامي : وأخيراً عملت إيه في حكايته ؟ .. طارت منك ..
- نجيب : طبعاً ...
- سامي : والنتيجه ؟ ..
- نجيب : النتيجه ؟ .. مفيش نتيجته غير اني دلوقت محسوب في عداد الأموات ، وشوف لي طريقه ؛ لأن المسأله جد مش لعب .
- سامي : أشوف لك طريقه ازاي ؟ .. ما سألتش مين دي ؟ ..
- بنت مين ؟ ..
- نجيب : أبداً .. أبداً ..
- سامي : ما شفتش ثمره الأوتوموبيل كام ؟ ..
- نجيب : أبداً .. أبداً ..
- سامي : طيب تعرف ماركته إيه الأوتوموبيل على الأقل ؟ ..
- نجيب : أبداً .. أبداً .. ما اخدتش بالي .. هو انا كنت فاضى أشوف ماركة الأتوموبيل والا ماركة وشها ..
- سامي : وما اخدتش تاكسي ورحت وراها تشوف ساكنه فين ؟ ..
- نجيب : أبداً .. أبداً ..

(رصاصة في القلب)

- سامى : ادينى عقلك ! .. عايزنى أعمل لك إيه بقا بدمتك ؟ ..
- كل حاجه أبدا .. شارلوك هولمز أنا والاشمهورش ؟ ..
- والا عايزنى أضرب لك الرمل ؟ ..
- نجيب : انت مستحيل تعرف الحب .. آدى كل اللي اقدر اقوله
بالاختصار لواحد مغفل زيك ..
- سامى : أشكرك .. لورفوار .. (يتحرك للخروج) ..
- نجيب : اسمع .. أنا لأول مره فى حياتى اتلخمت .. وبقيت
واقف تايه مش حاسس بالدنيا .. وفجأة طلعت
اجرى حاطط إيدى هنا .. (يشير إلى قلبه) زى
واحد مضروب عيار نارى .. لغاية ما وصلت
عيادتك .. تسمى ده إيه ؟ ..
- سامى : أسميه مرستان ! ..
- نجيب : الحب الحقيقى .. اللي ما يحصلش إلا مره واحده فى
الحياه ! ..
- سامى : عندها أتومبيل طول الأوده دى مره ونص تمام .. أهو
ده الحب الحقيقى .. هسانو .. ريزوتا ..
فراسكىنى .. باكار .. ماركة من دول تفتح لك جميع
الشوارع المنوعه ، ولا تحتاجش لمصلحة التنظيم ..

- نجيب : (يبصق في الأرض ازدراء) انت رجل مادي !..
- سامي : اسمع يا نجيب نصيحه : أنا اشجعك انك تغسوى
العربيات اللي طول الأوده دي مره ونص .. ماليتك
تنتظم ، وتعيش مرتاح ..
- نجيب : أنا احتقر الكلام اللي بتقوله ده ..
- سامي : انت حر ..
- نجيب : واحتقر الفلوس ..
- سامي : طيب .. أوفوار .. (يتحرك) ..
- نجيب : رايح فين ؟ ..
- سامي : رايح لخطيبتى فى أمر مهم .. وراجع بعد ربع ساعه ..
لأن عندى عيانيين ...
- نجيب : (يتمدد كالريص) أنا عيان ..
- سامي : انت قاعد هنا .. أنا رايح بقى .. (يتجه إلى
الباب) ..
- نجيب : رايح فين ؟ ...
- سامي : مش ضرورى اقول لك ألف مره أنا رايح فين ؛ لأن
عقل حضرتك تايه النهارده !..
- نجيب : عندى هبوط فى القلب ..

- سامى : أحسن .. نهارك سعيد .. (يحاول الخروج) ..
- نجيب : (ينهض على قدميه بسرعة ويصيح به) اقف عندك .. رايح فين ؟ .. أنا باقول لك عندى هبوط فى القلب يا ابن الكلب .. ومضروب بالرصاص ، وحالتى خطرته ..
- سامى : برده حانرجع للرصاص ؟!؟
- نجيب : (فى صوت قاصف) شوف لى دوا فى الحال لهبوط القلب والا وشرفك أطرباً العيادة علسيك وعلى العيانيين ..
- سامى : بقا دا صوت واحد عنده هبوط فى القلب ؟!؟
- نجيب : (ينزل صوته بسرعة إلى طبقة منخفضة) انت يا سامى يا خويه عندك دوا عجيب ضد هبوط القلب ..
- سامى : إيه هو ؟
- نجيب : (يترنم) ورقة بجنيه يا عزيزى ، جنيه مصرى والا انجليزى ، ينحط كده فى الجيب ، يجمد القلب ويطيب ..
- سامى : (ينظر إليه شزراً لحظة) بقا اسمع .. يعنى يصح تضيع من وقتى ربع ساعه فى اختراع الحكاياه الطويله

العريضة دى علشان كده ١٩..

نجيب : (يمد يده) لا أبدا .. مسألة الحب حقيقيه ولا شك

فيها ، وبكره تشوف .. أما الجنيه فده من زمان

موصوف لى فى الحالات الخطره اللي زى دى !..

سامى : (يخرج محفظة نقوده) وشرفك أنا لازم اعزل حالا

من شقتى اللي فى قصر النيل .. دامين يسكن فى عماره

ساكن فيها انت ..

نجيب : (يخطف ورقة بجنيه من يد سامى) هات الله

لا يجرمك منى .. ابقى ضيف على الحساب !..

سامى : (فى تهكم) حساب ؟ .. نهارك سعيد ..

(يخرج)

نجيب : (يضع الورقة فى جيبه بعناية) سعيد مبارك

يا افندم .. (ثم يرتب هندامه) دلوقت بقا حيث اتنا

اطمانينا على مستقبلنا الباهر لمدة ٢٤ ساعه .. يجب

البحث عن صاحبتنا اللي عنينا ماركة « بروننج » ..

(يخرج علبة سجائر ويتناول سيجارة ...)

(الباب الآخر للحجرة يطرق)

نجيب : مين ؟ .. (الطرق يعود فيشتد) اسكت يا عيان

الدكتور جاي حالا ..

(الطرق يشتد ...)

سيده : (من الخارج تصيح) ادخل والا لأ ..

نجيب : (في غير اكرات) لأ ..

السيدة : (من الخارج) ليه ما ادخلش ؟ ..

نجيب : كده ! ..

السيدة : (صائحة) لازم ادخل ! ..

نجيب : (هو يشعل سيجارته) ادخلي ..

(الباب الأيمن يفتح وتظهر « فيفي » غادة مصرية

أرستقراطية رشيقة جميلة ذات أعين فتاكة وبمجرد أن

يراهما نجيب يفت ويبت وتسقط منه سيجارته من

فمه)

فيفي : فين الدكتور ؟ ..

(تبحث بعينها في أنحاء القاعة ...)

نجيب : (بلا حراك) ؟ ..

فيفي : (تتأمل جهوده في دهشة) الدكتور فين ؟ ..

نجيب :

فيفي : الدكتور مش هنا من فضلك ؟ ...

- نجيب : (كأنما كان يخاطب نفسه) مش ممكن .. (ثم
يصحو لنفسه ويلتفت بسرعة إلى فيفى) أفندم ..
فيفى : فين هو ؟ ..
نجيب : هو مين ؟ ..
فيفى : (فى شىء من الصبر النافذ والحدة) الدكتور سامى
طبعًا ..
نجيب : آه .. طبعًا .. ما تأخذنيش .. أنا ..
فيفى : (صائحة فى ضيق عصبى فجائى) الدكتور
سامى ...
نجيب : (فى الحال وقد خاف من صيحتها العصبية الفجائية)
ما اعرفوش ..
فيفى : (صائحة فى ضيق عصبى كذلك كالمرّة السابقة)
انت فى عيادته هنا ما تعرفوش ازاي ؟ ..
نجيب : (فى خوف كذلك كالمرّة السابقة) طيب اعرفه ا ..
فيفى : (تتأمله لحظة من رأسه لقدمه كمن حسبته غيولاً) يعنى ،
حضرتك ما تقدرش تقول لى إذا كان الدكتور موجود
والا مش موجود ؟ ..
نجيب : أقدر أقول لحضرتك ..

- فيفى : (فى تهكم) إمتى ان شاء الله ؟ ..
- نجيب : حالا إن شاء الله .. بس ..
- فيفى : بس إيه ؟ ..
- نجيب : حلم حضرتك على شويه ..
- فيفى : (تنظر إليه فى استغراب وضيق) أنا منتظره ..
- نجيب : (يتألك) أيوه يا افندم .. حضرتك منتظره ..
مين .. ؟
- فيفى : (تنظر إليه نظرة نافذ الصبر الذى يحلم لآخر مرة)
منتظره أعرف الدكتور سامى هنا والا لآ ؟ ..
- نجيب : (كمن يفيق) آه .. الدكتور سامى .. آه .. يعنى
الدكتور سامى ؟ .. أيوه يا افندم أقدر اقول
لحضرتك ..
- فيفى : أظن المسألة مش محتاجة للوقت ده كله علشان تقول
لى الدكتور هنا والا مش هنا ..
- نجيب : تحبى أكون صريح شويه ؟ ..
- فيفى : تفضل ..
- نجيب : أنا محتاج خمس دقائق علشان ارجع لحالتى الطبيعىه ..
- فيفى : (تنظر إليه لحظة) يعنى دلوقت بأى حال ما تقدرش

تجاوبنى ؟ ..

نجيب : مستحيل أقدر اجاوب حضرتك على أى سؤال بالشكل ده ..

فيفى : بالشكل ده ازاي ؟ ..

نجيب : ولو فيها رزالة غمضى عينيك شويه ..

فيفى : (تنظر إليه شزراً) يعنى إيه ؟ ..

نجيب : يعنى اعملى كده ..

(يغمض عينيه)

فيفى : مش فاهمه ..

نجيب : لأ ؛ لازم تفهمى من فضلك ..

فيفى : أفهم إيه ؟ ..

نجيب : تفهمى إن البروننج فيه ست رصاصات بس ..

وانطلقوا كلهم خلاص أكثر من كده يقسى

مترليوز .. وروحي راحت من أول رصاصه .. وإذا

كنت سيادتك فاهمه إني بسبع أرواح أو إني معجون

بالأسمنت المسلح يقسى ظلم .. وانت ما

يخلصكيش .. والا انا غلطان فى الكلام ده ؟ ..

(لحظة صمت ...)

- فيفى : (تنظر إليه من رأسه لقدمه كالمرتاب في عقله) أنا
كنت فاكهه الدكتور سامى حكيم باطنى بس ! ..
- نجيب : (فاهما قصدها) قصد حضرتك إيه بقا ؟ ..
- فيفى : ولا حاجه .. أنا ما قلتش حاجه زياده عن كده ..
- نجيب : أولا أنا مش عيان ..
- فيفى : طبعًا مش بيطنك ..
- نجيب : يعنى سيادتك عايزه تقولى انى عيان بحاجه تانيه ؟ ..
- فيفى : أنا مش عايزه اقول حاجه أبدًا .. ولا فيش داعى لكده
بالمرة ، لأنى مش جايه هنا دلوقت علشان اقول لك
انت عيان بإيه ..
- نجيب : أمال حضرتك جايه هنا علشان إيه ؟ ..
- فيفى : جايه بالطبع لشيء تانى .. أقابل الدكتور سامى ..
- نجيب : لأسباب صحيه طبعًا ؟ ..
- فيفى : أيوه .. و كان علشان .. أولا .. اسمح لى أعرف ..
حضرتك مين هنا ؟ ..
- نجيب : حضرتقى مين هنا ؟ ..
- فيفى : أيوه لو تسمح لى أعرف ...
- نجيب : حاضر .. أقول لحضرتك حالا ..

- فيفى : تفضل .. منتظر إيه ؟ ..
- نجيب : (يخرج علبة سجائره ويقدمها إلى فيفى)
سجارة ؟ ..
- فيفى : (بلا حراك) مرسى .. ما ادخنش ...
- نجيب : برافو .. عملت طيب قوى .. أنا ما احبش الست اللي
تدخن
(يتناول سجارة ويضعها في فمه)
- فيفى : أنا كإن ما احبش الراجل اللي يدخن ...
- نجيب : (في حركة غريزية ينزع في الحال السجارة من فمه
ويلقى بها على الأرض)
- فيفى : (في تهكم خفى) لأمفيش لزوم .. اشرب
سجارتك أحسن ! ..
- نجيب : (في قوة) لأ .. مش ممكن .. أنا مجنون ؟ ..
خلاص من اللحظه دى بطلت السجائر .. أنا مستعد
أتمهد لك وأقسم لك بشرفى وحياة ..
- فيفى : (في برود) وإيه الداعى ؟ .. دا شىء ما يهمنىش ...
- نجيب : (مصدوما) ما يهمنىش انى ابطل السجائر ؟ ..
- فيفى : بالتأكيد لأ .. يهمنى فى إيه ؟ ..

- نجيب : مش لما ابطل السجاير صحتى تتحسن ...
- فيفى : وانا مالى ؟... دا شىء يهملك انت ..
- نجيب : يهمنى انا بس ؟.. ما يهمش حد تانى أبدا ؟...؟
- فيفى : ما اعرفش .. انت بالطبع أدرى بظروفك ..
- نجيب : إن كان على ظروفى تأكدى إنها ألعن ظروف خلقها ربنا ، أولا أنا مقطوع من شجره ولا فيش حد يهتم ان كنت ادخن ولا انحرق .. ثانيا ، أنا ساكن لوحدى فى « أبارتمان » فى شارع قصر النيل .. ومحمد السفرجى سابنى امبارح وطفش .. ووالدى الله يرحمه ويحسن إليه وكذلك والدى الله يرحمها ويحسن إليها ، كانوا الاثنين من خيار الناس ، وكان عندهم ..
- فيفى : (تقاطعه وتلتفت جهة الباب) مع الأسف : عوضين التمرجى مش هنا علشان اسأله عن الدكتور سامى !..
- نجيب : (مصدوما) حضرتك متضايقه للدرجه دى من كلامى ؟..؟
- فيفى : (فى تردد) لأ .. إنما بس أنا شايفه الوقت غير مناسب علشان تحكى لى تاريخ حياتك ...

- نجيب : وإمتى امال تشوفى الوقت مناسب علشان ابقى احكى
لك تاريخ حياتى بالتفصيل ؟ ..
- فيفى : وإيه الضروره انك تحكى لى تاريخ حياتك بتفصيل أو
من غير تفصيل ؟
- نجيب : مفيش ضروره أبداً ؟ ..
- فيفى : بالتأكيد مفيش أبداً ..
- نجيب : إيه السبب ؟ ..
- فيفى : طبعاً .. أولاً أنا .. ما تأخذنيش .. ما اعرفكش ..
- نجيب : (مصدوقاً) أشكرك ..
- فيفى : لأ .. ما تشكرنيش .. دى الحقيقه ..
- نجيب : صحيح دى الحقيقه .. لكن ..
- فيفى : لكن إيه ؟ ..
- نجيب : لكن برده ما كنتش احب انك انت اللى تذكرينى
بها ..
- فيفى : أنا مضطره ...
- نجيب : (يطرق فى شبه إذعان وألم) طيب ..
- فيفى : (تنظر إليه فى صمت ثم تقول) إنت مع ذلك لغاية
دلوقت ما فهمتيش حضرتك تبقى مين هنا ؟ ..

- نجيب : (في كآبة) وإيه الفائدةه ؟! ..
- فيفي : بس أحب اعرف أنا بكلم مين ..
- نجيب : بتكلمى مين ؟ .. بتكلمى شخص مخلوق جديد لنج
من مدته ١٠ دقائق .. مالوش مستقبل .. مالوش غير
حاضر جميل يدوم كان بالكثير ٥ دقائق ..
- فيفي : مش فاهمه كلامك ..
- نجيب : أحسن ..
- فيفي : بدى أعرف بس أنت صفتك إيه فى العياده ؟ ..
- نجيب : ماليش صفة ..
- فيفي : انت لك صله بالدكتور سامى ؟ ..
- نجيب : صاحى ..
- فيفي : حكيم زيه طبعا ؟ ..
- نجيب : (شاردا) طبعا ..
- فيفي : (باسمه) الطيور على أشكالها تقع ..
- نجيب : (كمن يخاطب نفسه) صحيح أنا وقعت ؟ ..
- فيفي : بالتأكيد ..
- نجيب : (يرفع رأسه ويلتفت إليها فجأة) إيش عرفك ؟ ..
- فيفي : أنا أعرف انك ما وقعتش على الدكتور سامى هنا

إلا النهارده ، لأنى سبق جيت له كثير فى الوقت ده ...
نجيب : سبق جيتى كثير هنا قبل النهارده ؟ .. وانا كنت ساعتها
فى أنهى داهيه ؟ ..

فيفى : ما اعرفش ..

نجيب : (صائحا) اسمحى لى أقول لك انى انا انسان يستحق
الضرب بعشرين أو خمسة وعشرين صرمة نضيفه ! ..

فيفى : ما قدرش اقول لك بالضبط انت تستحق كام .. لكن
كل اللى اقدر اقله انك بتضيع وقتى بشكل غريب .
المهم فى كل اللى فات الدكتور سامى هنا والا مش
هنا ؟ ..

نجيب : (مصدوم منفعلى) الدكتور سامى مش موجود .. دا
كل اللى اقدر اقله .. وعشان ما اضيعش وقت
حضرتك بشكل غريب أقول لك أوقفوار ، أو ..
أديو ...

(يتحرك)

فيفى : فيه عيانيين بره منتظرين الدكتور .. مين رايح
يشوفهم ؟ ..

نجيب : ما اعرفش ...

- فيضي : الدكتور سامي ما قالش مين يشوف العيانيين ؟ ..
- نجيب : مفيش هنا عيانيين ..
- فيضي : فيه ..
- نجيب : مفيش ...
- فيضي : فيه ..
- نجيب : مفيش ...
- فيضي : بقول لك فيه بره في الصاله وفي أودة الانتظار ..
- نجيب : بقول لك مفيش هنا عيانيين ...
- فيضي : طيب روح شوف بعينك بره ! ..
- نجيب : أنا ما أكذبش نفسي واصدق عيني .. مفيش في العياده بل في العالم كله دلوقت غير شخص واحد بس اقدر اعترف بصحيح انه عيان ..
- فيضي : مين هو ؟ ..
- نجيب : المخلوق اللي واقف قدامك ...
- فيضي : إنت بتقول انك حكيم مش عيان ..
- نجيب : عيان ..
- فيضي : مش باين عليك ..
- نجيب : هو يعني علشان ما اكون عيان لازم يشيلوني على

نقالة !..

- فيفى : وعيان بايه ؟..
- نجيب : وأنا مجنون اقول لك أنا عيان بايه ، وحساس بايه ؟..
- مستحيل اقول ، ولو شنقوني ..
- فيفى : ليه بقا ؟..
- نجيب : كده .. ما اقولش أبدا ..
- (لحظة صمت)
- فيفى : (تنظر إليه قليلا) أحسن .. برده ما تقولش ...
- نجيب : أنا نفسي ما يمكنش اقول ..
- فيفى : أيوه ما تقولش ..
- نجيب : ما اقولش أبدا ..
- فيفى : أيوه كده ..
- نجيب : أيوه ...
- فيفى : أرجع للموضوع .. الدكتور سامي ما قالش حايرجع
- هنا إمتى ؟..
- نجيب : أوكد لك لو قلت لك أنا عيان بايه مستحيل
- تصدق ..
- فيفى : قلت لك خلاص ما تقولش .. انتبهنا ..

(رصاصة في القلب)

- نجيب : علشان كده ما يمكش اقول ..
- فيفى : ما تقولش ..
- نجيب : أيوه ما اقولش ..
- فيفى : أيوه كده ...
- نجيب : أيوه ...
- فيفى : إذا كان الدكتور سامى مش راجع دلوقت أقدر اسيب له كلمه .. (فجأة تضع يدها على ضرسها متألمة) آه ..
- نجيب : (فى لفقة) مالك ؟ ..
- فيفى : (تخرج منديلها وتضعه على فمها) ستى ..
- نجيب : (فى اهتمام وقلق) بتوجعك ؟؟ ..
- فيفى : قوى ...
- نجيب : (يهرول فى الحجرة كأنه يبحث عن شىء) فين ؟ ..
- فيفى : (فى حيرة) فين ؟ ..
- فيفى : بتبحث عن إيه هناك ؟ .. ستى هنا ..
- (تشير إلى فمها ...)
- نجيب : أيوه فاهم .. أنا يبحث عن الدواء .. فين الدواء .. أولا إيه هو الدواء بالضبط .. على كل حال أنا لازم اشوف

لك طريقه .. لأنى مقدرش اشوفك متألمة من أى
شء .. فىن التمرجى ؟ .. فىن الدكتور ؟ .. إنت لازم
لك واحد دكتور حالا ...

فىفى : إنت مش بتقول انك دكتور ؟ ..

نجيب : آه .. أيوه برضه .. لكن حتى على فرض انى دكتور
ما اقدرش أعالجك انت ..

فىفى : ليه ؟ ..

نجيب : مقدرش اقول لك ليه .. المهم دلوقت إيه اللى فى
إمكانى أعمله علشانك ؟ .. سنتك بتوجعك
قوى ؟ ..

فىفى : أيوه .. دلوقت بس وجعتنى مش عارفه ليه ؟ ..

نجيب : ورنى ، افتحى بقبك .. فىن السنه دى .. ؟ (تفتح

فمها فتظهر أسنانها) أولا ده ضرر مش سنه ..

علشان تصدق انى دكتور .. ثانيا فىن هسى

الاسنان ؟ .. أنا مش شايف غير صفين لولى من

الغالى !! .. إنت يلزمك واحد جواهرجى مش واحد

حكيم ..

فىفى : لأ ... أرجوك .. ضررسى بيوجعنى .. شوف لى أى

علاج حالا ..

نجيب : علاج زى إيه ؟ ..

فيفى : مش أنا طبعا اللي اقول لك ..

نجيب : أصل انا بس مش حكيم اسنان ..

فيفى : أمال حكيم إيه ؟ ..

نجيب : (فى تردد) حكيم .. (ينظر إلى عينيها الساحرتين)

عيون .. أيوه أنا حكيم عيون .. لأنى أفهم فى

العيون .. ودرست العيون .. وقاسيت من العيون ..

فيفى : لكن احنا دلوقت فى الاسنان .. واللى بيوجعنى

ضرسى ..

نجيب : تأكدى إن ضرسك عزيز على قوى .. لكن بقا مع

الأسف ..

فيفى : اسمع يا دكتور .. أنا اعرف إن الألم دائما جاى من

عصب الضرس لما الواحد ياكل حاجة متلجسه ..

ولذلك أى مسكن بسيط ..

نجيب : (بسرعة) أيوه مسكن .. عليك نور .. أهوده الدواء

اللازم .. بس كان تايه عن بالى .. إنما بقى المسكن ده

يعنى الواحد يتعاطاه سفوف ، والا معلقة شوربه قبل

الأكل ، والا إليه ؟..

فيفى : (تنظر إليه مليا) إئت يظهر أنك مش دكتور أبدا ..

نجيب : دكتور فى العيون بس يا افندم ..

فيفى : ولا حتى فى العيون ...

نجيب : الله يساعك .. المهم عندى ان أملك يزول بأى

طريقه .. أنا مصرح لك : اشمينى .. اضربينى ..

أنا افتكرك ان أحسن مسكن هو أنك تشغلى نفسك عن

الألم بيهدلتى ولعن أبو خاشى .. أظن دى أحسن

طريقه ..

فيفى : لكن ده مش علاج طبي ..

نجيب : مش ضرورى العلاج يكون طبي .. مش أنا حكيم ..

لكن أؤكد ان البلاوى الثقيله ما تجيش الا من تحت

راس الحكما ..

فيفى : (فى سخرية) إئت حكيم مدهش ا..

نجيب : جايز .. إنما الأصح انى بنى آدم متألم دلوقت بشكل

مدهش ..

فيفى : مش باين عليك أبدا ..

نجيب : ما هو برده ، ده من سوء حظى ..

- فیفی : ومع ذلك كونك انت كان متألماً دا شيء ما يهمنيش ..
- نجيب : وانت إيه اللي يهملك ؟! ..
- فیفی : المهم عندي حاجة تسكن ضرسي ..
- نجيب : ضرسك لسه يوجعك ؟...؟
- فیفی : إيوه ..
- نجيب : خالص ؟...؟
- فیفی : خالص ..
- نجيب : أحسن ..
- فیفی : إزاي أحسن ؟..
- نجيب : علشان تاني مره تحرمي الوقوف قدام جروبي تاكلي « جلاس » .. توجعي ضرسك وتموتق الناس ! ..
- فیفی : (في دهشة) وعرفت ازاي اني أكلت جلاس قدام جروبي ؟..
- نجيب : حاجة بسيطه ..
- فیفی : لازم شفتني قبل دلوقت بشويه ..
- نجيب : لأ ..
- فیفی : أمال عرفت ازاي ؟..
- نجيب : ما تعرفيش اني أقدر أقرا كل شيء في فكرك وفي

ضميرك في قلبك ؟..

- فيفى : حكيم روحاني حضرتك ؟..
نجيب : بالضبط ا..
فيفى : (في محكم) أظن زي ما انت حكيم عيون ؟..
نجيب : أحسن شويه ..
فيفى : طيب اقرا اللي في ضميري ..
نجيب : (يقف وقفة صناعية وينظر إليها مليا ثم يتحنج) في ضميرك اني شخص ضيع وقتك بشكل غريب ..
فيفى : كذاب ..
نجيب : (في فرح) صحيح ؟..
فيفى : ما تسألنيش .. العالم الروحاني الحقيقي ما يسألش الزبون .
نجيب : بدى اطمن ..
فيفى : مش من وظيفتك انك انت اللي تطمنن يا حضرة الساحر العجيب ..
نجيب : أوكد لك إنك ألطف إنسانه شفتها ..
فيفى : أنا مش عاوزه تقرا لي اللي في ضميرك انت ا..
نجيب : عندك حق .. اللي في ضميري أنا مفهوم طبعًا ..

- وسحرك انت بس اللي قدر يكشف ضميري ..
- فيفى : إحنا في سحرك انت ا..
- نجيب : (فوحا) وأنا لي سحر !؟ ...
- فيفى : إنت اللي بتقول ..
- نجيب : (متذكرا) آه ..
- فيفى : قرئت إيه كان في فكرى ؟ ..
- نجيب : (ناظرا إليها مليا) إنت مدهشه ا..
- فيفى : دا شيء مش في فكرى طبعا ..
- نجيب : انت مش بسيطه أبدا ..
- فيفى : ومين بسيط في الزمن ده ؟ ..
- نجيب : أنا بقرا في قلبك كلام يخوف ..
- فيفى : يخوف ليه ؟ .. ويخوف مين ؟ ..
- نجيب : يخوفنى ...
- فيفى : يخوفك انت ؟ .. إنت كل حاجه تمحشر نفسك فيها ؛
حتى قلبى ؟ ..
- نجيب : يا ريت أقدر انحشر في قلبك ؟ ..
- فيفى : (تبسم) إيه بقى اللي خوفك ؟ ..
- نجيب : أولا بصيت في قلبك لقيته فاضى ، أفضى من جيب

- نجيب من قبل عشر دقائق ا..
- فيفي : كذاب ..
- نجيب : إزاي ا؟ .. قلبك مش فاضى ؟ ..
- فيفي : لأ ..
- نجيب : مشغول ؟ ..
- فيفي : طبعاً ..
- نجيب : (فى فرح) كويس .. تسمحنى لى بقا أسألك سؤال واحد ؟ ..
- فيفي : (فى تقطيب) أنا عارفه السؤال الواحد ده ، وما اسمحش به أبداً ..
- نجيب : لأ .. إعملى معروف أنا محسوبك ، متجيش لغاية النقطة الحساسه وتعاكسينى .. كلمه واحده يتوقف عليها مستقبل حياتى ..
- فيفي : كلمة إيه ؟ ..
- نجيب : مين هو .. ؟ مين هو السعيد اللى ... ؟
- فيفي : مستحيل .. يظهر إنى تساهلت معك فى الكلام أكثر من اللازم .. عاوز كان تعسرف أسرارى الخصوصيه ا؟ ..

- نجيب : وماله ؟.. إنت أولا أجمل وأذكى وأشجع آنسه
مصريه عرفتها ..
- فيفى : مش عاوزه تقرىظ من فضلك ..
- نجيب : تقرىظ ؟.. دى حقائق .. أنا عاوز اقول لك انك زى
ما ظهر لى واحده مش بسيطه من بتوع زمان .. إنت
واحده فاهمه كل شىء فى الدنيا .. تعليم ، وتهذيب ،
وذكاء .. بالطبع دى أكبر قوة وأعظم سلاح فى يد
الست تقدر تعيش به فى وسط العفاريه .. إيه اللى
يهم واحده زيك دلوقت انها تكون صريحه مع واحد
زى ا ..
- فيفى : ما تبلغنيش من فضلك ..
- نجيب : مش بلف أبداً والله ..
- فيفى : عاوزنى أكون صريحه فى إيه ؟..
- نجيب : أولا أنا مش عاوز أعرف إنت مين .. ولا ماركة
أتوموبيلك إيه .. ولا ساكنه فىن ا ..
- فيفى : آمال عاوز إيه ؟..
- نجيب : عاوز اعرف بكل صراحه .. فاهمه ؟.. بكل
صراحه ، مين هو المخلوق اللى شاغل قلبك ؟..

- فيفى : واحد من الناس ..
- نجيب : مفهوم ، قصدى مين هو يعنى ؟...
- فيفى : وإيه يهملك إن كان زيد والاعمرى ؟..
- نجيب : (فى تردد) هو موجود ؟..
- فيفى : طبعاً على قيد الحياه ...
- نجيب : (متردداً) لأ .. قصدى موجود .. هنا ؟..
- فيفى : أيوه .. موجود فى مصر ..
- نجيب : (خائفاً) قصدى كان يعنى .. بس جاوبينسى
بالصراحه .. فاهمه ؟.. بكل صراحه ه هو موجود
هنا فى الأوده دى والا لأ ؟..
- فيفى : (مندهشة) سؤال غريب ؟..
- نجيب : عاوز الصراحه .. هو موجود قدامك دلوقت والا
لأ ؟..
- فيفى : طبعاً لأ ..
- نجيب : (يحاول الهدوء) آه ..
- فيفى : (تلاحظ تغيره) مالك ؟..
- نجيب : لأ .. مفيش حاجه أبداً .. يعنى قصدك انه واحد
تالى .. مش موجود هنا ؟..

- فيفى : طبعا ..
نجيب : (يطرق) آه ..
فيفى : (تنظر إليه) زعلت ؟ ..
نجيب : (يرفع رأسه) لأ .. ما فيش زعل أبدا ..
فيفى : أظن أنا جاوبتك بصراحة زى انت ما طلبت تمام ؟ ..
نجيب : (فى إطراق) أيوه .. تمام .. مرسى ...
فيفى : أقدر أقول لك كان إذا كنت عاوز إيضاح أكثر من
كده إنه خطيبي ..
نجيب : مش مهم ..
فيفى : وإنه حكيم زيك ، لكن يمكن يعرف صنعته أحسن
منك شويه ..
نجيب : طبعا ..
فيفى : أقدر أقول لك إنك يمكن تعرفه ..
نجيب : جايز ..
فيفى : وإنه ربما يكون صاحبك ..
نجيب : زى بعضه ..
فيفى : تستعلم عن حاجه تانية كان ؟ ..
نجيب : لأ .. خلاص متشكر .. ده كل اللي انا كنت عاوز

اعرفه .. نهارك سعيد ..

(ينحنى ويتناول سيجارته التي ألقاها على الأرض
ويمسحها في كفه ويضعها في فمه .. صمت
طويل .)

نجيب : نهارك سعيد ...

(يتجه إلى الباب ليخرج)

فيفى : (تنظر إليه باسمة ، وعندئذ تتحرك نحو الباب
الآخر) يا عوضين ! ..

(تخرج)

نجيب : (لا يزال يفكر) ..

سامي : (داخلا من الباب الواقف أمامه نجيب) إنت لسه
هنا .. لسه هنا ومعاك جنيه ؟! .. مارحتش ليه تبحت
عن صاحبك ..

نجيب : (ينظر إليه ولا يجيب ...)

سامي : (يترك نجيب ويهرع باحثا) فيفى .. (لنجيب)
فيفى خطيبتى هنا .. ما شفتهاش ؟ ..

فيفى : (تدخل) سامي ! ..

سامي : أنا يظهر رحمت لك من هنا ، وانت جيتى من هنا ..

- تعالى أولاً لما أقدم لك نجيب صاحبى وصديقى
وجارى فى السكن (يقدم أحدهما للآخر) ..
- فيفى : (بتهكم) تشرفنا ..
- نجيب : (لا يجسر على النظر إليها) تشرفنا يا أفندم ..
- فيفى : حضرته طبعاً حكيم زيك يا سامى ..
- سامى : أبدا .. ده موظف مهم ...
- فيفى : (لنجيب فى تهكم) كده ا؟ ..
- سامى : وفضلاً عن ذلك معروف فى كل مكان إنه من أظرف
شخصيات البلد ، ما يفر كيش انه واقف كده مبلم
زى اللى خطفوا محفظته .. ده بس علشان حصلت له
حادثة من مدة نصف ساعه ...
- فيفى : حادثة إيه لا سمح الله ؟ ..
- سامى : شاف واحده فى أتومبيل قدام جرونى بتاكل جلاس ..
- نجيب : (بسرعة) قصدى حادثة أتومبيل .. كان حا يحصل
تصادم ..
- سامى : بلاش كذب يا نجيب ..
- فيفى : وجرى إيه ؟ ..
- سامى : ما فيش تصادم ولا حاجه .. الحكايبه كلها إنه

بيحب ..

- نجيب : (في حيرة) كلام إيه ده يا سامي
سامي : فيفي « سبور » ما تخفضش .. هو الحب عيب ؟ .. مش
كده يا فيفي ؟ .. بدليل انا حيننا بعض ..
فيفي : طبعًا يا سامي ..
نجيب : (يدير وجهه ويتحرك) نهار كم سعيد ! ..
سامي : الله .. انتظر .. قل لنا نويت على إيه .. احنا لازم
نساعدك ونشوف لك طريقه .. ما دمت أول ما
شفتها اتلخمت وغرقت في شبر ميه ولا عرفتش هي
مين ولا ساكنه فين ؟ .. فأظن مش لطيفه انا نسيك
كده وحلان لشوشتك ..
نجيب : أرجوك يا سامي تريح نفسك من جهتي ا ..
سامي : إنت مكسوف تقول انك بتحب ؟ ..
نجيب : وبعدين معاك ؟ ..
سامي : إنت مش قايل لي أبلغ عن وفاتك ؛ لأن عينيا قتلتك
ومت نخلص وانضربت بالرصاص ، ولا تقدرش
تعيش من غيرها .. حصل والا ما حصلش ؟ ..
فيفي : للدرجة دي ؟ ..

- نجيب : كلام ..
- فيفي : طبعا كلام ! ...
- نجيب : والدليل على كده إني عايش أهوه كويس بصحة جيده
أربعة وعشرين قيراط ..
- فيفي : دا من حسن الحظ ..
- سامي : (وهو يخلع جاكته ويرتدي معطف العمل)
ما تصدقش .. شوفي وشه أصفرازاي ؟ .. أنا اراهن
إن ما كان وزنه نزل النص ..
- نجيب : (صائحا) يا سيدى ما لكش دعوى بوزنى اعمل
معروف ! .. انت حد مسلطك على النهارده ؟ ..
- سامي : شوف انت بقيت عصبى ازاي ؟ .. ما يصحش
توصل حالتك للدرجة دى واسيبك ..
- نجيب : وعاوز منى إيه بقا انت دلوقت ؟ ...
- سامي : أشوف لك طريقه حالا .. أنا كنت الأول مستعجل
ودلوقت فضيت لك .. اسمع : أحسن حل انك
تروح « جرونى » وتسال ..
- نجيب : أسأل عن إيه ؟ ..
- سامي : عن الست صاحبة الأتومبيل الفخم اللي كانت بتاكل

- جلاس يمكن تكون معروفه هناك ..
- نجيب : طيب وان عرفتها يجرى إيه فى الدنيا ؟ .. إيه اللي راح يتغير فى حياتى ؟ ..
- سامى : إيه التخفيل ده ؟ .. إن عرفتها تبقى خلاص المسأله انحلت ، تبقى نجحت يا عزيزى واهنيك واستحق منك الحلاوه مش كده والا إيه يا فيفى ؟ ..
- فيفى : (باسمه) بالتأكيد ! ..
- نجيب : (خافنا وهو ينظر إليها) شىء غريب ! ..
- سامى : يالله طيران على جرونى .. ما تضيعش دقيقه واحده ! ..
- نجيب : (يتحرك) حاضر .. نهار كم سعيد ..
- سامى : (بسرعة) انتظر يا نجيب (يذنبو منه ويهمس إليه) .. اسمع ... انت مش لازم لك كان فلوس ؟ ..
- نجيب : لأ ..
- سامى : عجيبه ! ... لأول مره فى حياتك الفلوس مش لازمك ! ..
- نجيب : (يخرج الجنينه من جيبه) خد .. ده كان مش لازمى ..

(رصاصة فى القلب)

- سامى : (فى دهشة) مش ممكن ا. :
- نجيب : (يعطيه الجنيه) لأول مره فى حياتى أسلف فلوس ا. ..
- سامى : قصدك .. ترد السلف ..
- نجيب : الاثنين واحد نهارك سعيد ..
- سامى : اسمع .. ورايح تقابلها ازاي وانت ما معكش فلوس ..
- نجيب : (صائحا) أقابل مين ؟ .. مين هى اللى اقابلها ؟ ..
- ما تقولش الكلام ده بقا أحسن ما يحصلكش طيب ..
- أنا مش مقابل حد أبدًا .. سيبنى اعمل معروف بقا
- خلينى اروح لأشغالى .. أنا واحد عندى شغل فى
- الوزاره .. وانت النهارده ضيعت وقتى النفيس ا. ..
- سامى : وقتك النفيس (يلتفت إلى فيفى) بقول لك أصبح
- عصبى .. ما كانش كده أبدًا ..
- فيفى : (لنجيب فى تهكم خفى) اشرب فنجان ينسون دافى
- يا نجيب بك
- نجيب : (ينحنى) أشكرك ا. ..
- سامى : صحيح .. الينسون الدافى ده مدهش ..
- نجيب : حاضر ا. .. حاشرب ينسون دافى ..
- فيفى : وحمام سخن قبل النوم ..

- نجيب : حاضر ..
- سامي : صحيح الحمام سخن قبل النوم مدهش ..
- نجيب : آخذ حمام سخن ! ..
- فيفي : وخذ بعد كده ..
- نجيب : إيه تاني .. دش بارد كان ؟! .. اعملوا معروف كفايه .. اسمحولي أروح لحالي .
- فيفي : « الباكار » بتاعتى تحت تقدر توصلك ..
- نجيب : ممنون .. أنا ما اركبش لا باكار ولا دو كار ..
- سامي : سيبيه يمشى على رجليه .. ودا وش نعمه ؟ ..
- فيفي : علشان أظن البك مستعجل .. احنا يظهر ضيعنا وقتك النفيس يا نجيب بك ؟! ..
- نجيب : بشكل غريب ! ..
- سامي : (يلتفت إليه مقطبا) ازاي ؟ ..
- نجيب : (صائحا منفجرا) أقسم بالله العظيم لو تكلمت كلمه زياده ، لأطرباً عليك العياده وزى ما ترسى .. أنا لا قابلت ست فى جرونى بتاكل جلاس ولا سم هارى .: والحكايه ملفقه من أولها لآخرها علشان ألتش منك جنيه .. ولو اسمعك تجيب لى سيرة الست

- دى مره تانيه أنا اضربك بالرصاص !..
- سامى : الرصاص إياه اللي انضربت به النهارده ؟!..
- نجيب : أنا باكلمك جد .. وانت الجاني على نفسك ..
- سامى : انت جرى لك إيه يا نجيب ؟..
- نجيب : أنا متأسف أكلمك باللهجه دى قدام الست .. لكن أنا مضطر « لفيفى » ما تأخذنيش !..
- فيفى : (باسمه) خد راحتك فى الكلام ..
- سامى : معذور !.. أنا مش قادر أفهم يا نجيب ازاي تيأس للدرجه دى ؟.. احنا نبحت لك عنها يا سيدى من تحت الأرض .. بس اهسدا وروق دمك وكسون مطمئن .. دى مسأله فى غاية البساطه .. أنا أتعهد لك وأكون مسئول ..
- نجيب : أصل المصيبة انك ما بتفهمش عربى أبدًا .. دماغك متركبه شمال .. أعمل لك إيه ؟.. الأمر وما فيه يا سيدنا الافندى إن حكاية ماهاش أساس بالمره . فهمت كلامى ؟.. يعنى لا كان فيه ست ، ولا جلاس ، ولا أتوموبيل ..
- سامى : مفهوم .. لأنك ضيعت ده كله بلخمتك ..

- نجيب : ما فيش فايده !..
- سامي : لأنك انت لما تحب ..
- نجيب : (مقاطعًا) قلت لحضرتك ما فيش حب !..
- سامي : كده !؟ ...
- نجيب : تصدق ما تصدقش انت حر .. أولاً أنا ما اقدرش ادخل جروني ، لأن مرسيل اللي واقف على البار له في ذمتي ٢٠ جنيه من حساب وغيره ..
- سامي : حتى البارمان اللي واقف على البار ؟.. والله انت لو دخلوك الجنة برده تستلف من سيدنا رضوان اللي واقف على الباب !..
- نجيب : ما حدش له بي شأن ..
- فيفي : طبعًا ما لناش شأن أبدًا ..
- نجيب : على كل حال .. يكون في معلومك اني ما احبش الست اللي كانت بتاكل جلاس قدام جروني .. ما احبهاش .. أنا حر .. ما احبهاش أبدًا .. حد شريكى ؟.. بالعكس .. أنا اكرهها دلوقت زى ما اكره فاتورة الحساب !.. فاهمين .. ما احبهاش .. ما احبهاش ..
- سامي : أقطع دراعى ان ما كان ده هو الحب ..
- فيفي : (ضاحكة وتقول بصوت خافت) مسكين يا نجيب !..

الفصل الثاني

(الشقة التي يسكنها نجيب بشارع قصر النيل : صالون بسيط حسن الذوق .. باب في الصدر وباب في الجهة اليمنى صغير ، وباب بلكون في الجهة اليسرى .. منضدة كبيرة على شكل صندوق في وسط الصالون .. وعليها غطاء فلا يدرك الرأى لأول وهلة أنها صندوق .. تليفون على منضدة أخرى صغيرة وجراموفون على منضدة ثالثة ، كذلك مرآة في الحائط ..)

نجيب : (أمام المرآة بالقميص والبنطلون يربط الكرافطة .. يذق جرس باب الشقة .. فينتفض نجيب ويسرع إلى وسط الصالون) .. جرس الخطر ! .. (يتجه إلى

- المنضدة التي كالصندوق ويرفع غطاءها ، فيفتح
الصندوق فيدخل فيه ويتمدد ، ويفلق عليه
الغطاء ... وعندئذ يدخل عبد الله من باب الصدر)
عبد الله : (في يده ورقه) سي نجيب بك .. ياسي نجيب
بك .. اظهر جنابك وبان وعليك الأمان ! .. مفيش
حد من اياهم .. دا انا عبد الله البواب ...
نجيب : (يرفع الغطاء ويظهر من الصندوق ويظل لحظة
يرمي عبد الله بنظرات شزراء ثم ينفجر) انت مش
عبد الله البواب ، انت عبد الله الجحش .. حضرتك
مش ناوى تبطل اللعب في جرس الخطر ؟ ..
عبد الله : نسيت ..
نجيب : يعجبك كده تخلى دمي يهرب من غير مناسبة ؟ ..
عبد الله : حصل خير ..
نجيب : (يرتقى على المقعد) اجري بقى شوف لي كباية لمون
بالتلج ..
عبد الله : وفين هو اللمون والتلج ؟ ..
نجيب : تصرف يا أخى .. بس شاطر تعكر مزاجى .. شىء
يجنن ..

- عبد الله : هات جنابك قرش نشترى به ..
- نجيب : يتقول إيه ؟ ..
- عبد الله : قرش ..
- نجيب : اسحب كلمتك بسرعه ..
- عبد الله : ما فيش حد دلوقت راضى يبيع لنا شكك ..
- نجيب : طيب خلاص اسكت .. صرفنا نظر .. لكن الحق مش عليك .. الحق على أنا اللي اسكن في عماره فيها بواب نتن زى حضرتك .. طول عمر البوابين تسلف السكان ، وانت راضى تطلع من جييك قرش واحد نجيب به تلج ..
- عبد الله : تصدق يا الله يا سى نجيب بك ؟ ..
- نجيب : مصدق بالله انك بارد ..
- عبد الله : أبدا .. وشرفك لو تعرف العذر .. دا انا مخصوص طالع لجنابك علشان أطلب ..
- نجيب : لأ .. اقصر الشر .. تطلب إيه ؟ .. انت انهيلت ؟ ..
- اسكت بقا خلاص .. لا تطلب منى ولا اطلب منك .. خلىنا كده حافظين مراکزنا .
- عبد الله : أنا على كل حال ما اتساش فضلك على ..

- نجيب : أيوه كده اتصلح اعمل معروف ..
(يتاول الجاكتة من على مقعد ويلبسها ...)
- عبد الله : بس ..
- نجيب : (يقاطعه) لأ .. في عرضك ما فيش بس ! .. ما
تبقاش زى الققط تاكل وتنكر .. انت لسه امبارح
واصلك منى نص ريال ..
- عبد الله : خليم النهارده ريال ..
- نجيب : وأجيب لك منين ؟ .. هو انت ربنا مشيعك دلوقت
علشان تتسبب في نكدي ؟ ..
- عبد الله : دا انا يا بيه حايش عنك بلاوى كثير ..
- نجيب : طيب ما تحوش نفسك عنى شويه دلوقت ..
- عبد الله : والله ان ما كنت انا موجود تحت ؛ لكان أصحاب
الديون طلوعوا هربدوا البيت .. ولا كان نفع فيهم
جرس خطر ، ولا صندوق ولا أى حيلة من حيننا
دى ! .. دا وكيل صاحب الملك كل يوم والثاني عايز
يقابلك علشان أجرة الشقة المتأخره ، وأنا اوزعه
واقول له انك مسافر .. وكل ما حد غريب يسأل عن
حضرتك أقول له مش موجود .. أمال فكر جنابك أنا

- قاعد تحت أقشر بصل ؟ ..
- نجيب : كل ده كويس .. لكن بقا ..
- عبد الله : لكن كله من قلة البخت ..
- نجيب : انت لاخر قليل البخت ؟ ...
- عبد الله : ربنا أعلم بحالى ..
- نجيب : علشان عاوز نص ريال ؟ ..
- عبد الله : نص ريال .. ربع ريال .. اللى يطلع من ذمتك ..
- نجيب : انت فاهم ذمتى دى جراب أطلع منه انصاص ريالات
وارباع ريالات ؟ ..
- عبد الله : بقى ما فيش النهارده جبر خاطر ؟ ..
- نجيب : ربنا أعلم بحالى ..
- عبد الله : النهارده أول الشهر ...
- نجيب : أول الشهر كان الصبح ..
- عبد الله : ودلوقت ؟ ..
- نجيب : دلوقت اسمه آخر الشهر ..
- عبد الله : كده بالعجل ؟ ..
- نجيب : النتيجة الرسمية بتاعتى كده .. أول الشهر بيتدى من
الساعة ٩ صباحا لغاية الساعة ١١ والدقيقه ٤٥ ..

يعنى على ما يضرب مدفع الضهر أكون شطبت
طبعًا .. إنت فاكر إيه ؟ .. احنا ما عندناش فلوس
تبات لتانى يوم ..

عبد الله : على كده جنابك رايح تعمل إيه فى دى ؟ ..
(يقدم الورقة التى معه ...)

نجيب : إيه دى ؟ ..

عبد الله : فاتورة حساب ..

نجيب : هس ! .. ما تسمعينش كلمة حساب .. إياك تنطق
بالكلمه دى فى بيتى .. أنا مؤمن على حياتى ضد
الكلمه دى ..

عبد الله : دا خريستو البقال ..

نجيب : ما اعرفوش ..

عبد الله : عاوز يقبض ..

نجيب : قل له بلاش عبط ..

عبد الله : له ٦٥٠ قرش استجرار الشهر اللى فات .. منهم ٣٠٠
قرش سلفه نقدية و ٢٠٠ قرش باقى الشهر اللى قبله و
١٥٠ قرش ..

نجيب : اسكت اعمل معروف .. ما فيش فايده .. ربنا خلق

- لى طبل ودان ما يلقطش الحساب ..
- عبد الله : الخواجه حلف ما يشكك حضرتك ..
- نجيب : حلف بايه ؟ ..
- عبد الله : حلف بدينه قدام بوابين الحته ..
- نجيب : إنه ما يشكككيش ؟ ..
- عبد الله : أبدا ..
- نجيب : (يعنى) قال إيه حلف مايشكككيش .. قال إيه حلف .. (فجأة ينفجر فى غضب) أقسم بالله الذى خلق السلف نعمة للناس إني لا أتعامل مع الوغد خريستو ده لا شكك ولا نقديه .. خلاص .. ميسوط ؟ ..
- عبد الله : ونجيب لوازمنين ؟ ..
- نجيب : شوف بقال تانى .. هو بقى ما فيش فى مصر غير خريستو ؟ ..
- عبد الله : ما فيش غيره .. وكافة بقالين الحته عرفتنا .. بقى لنا سنه ، كل شهرين نغير بقال ..
- نجيب : بقى احنا خلصنا بقالين قصر النيل كلهم ؟ ..
- عبد الله : خلصناهم كلهم، ودوبناهم فى عرق العافيه ..

- نجيب : ما فيش بقال فتح جديد ؟ ..
- عبد الله : أبداً .. أنا واخذ بالى طيب من كل دكان يفتح جديد ..
- نجيب : شىء بجنن ا... والعمل بقى دلوقت ؟ ..
- عبد الله : أحسن طريقه تدفع لخريستو قرشين من أصل المطلوب وارجع له ..
- نجيب : نرجع له .. مش ممكن .. أنا حلفت خلاص .. ما يمكنش ..
- عبد الله : خريستو برده مهاود ابن حلال ، أحسن من غيره ..
- نجيب : انت بجنون .. مستحيل .. وقع منى يمين ..
- عبد الله : إن الله غفور رحيم ..
- نجيب : حتى اليمين نعهد نبعزق فيه ؟ ..
- عبد الله : معلش .. برده أحسن من البهدله نراضيه ونرجع له ..
- نجيب : إنا لله وإنا لخريستو راجعون ..
- عبد الله : ندفع له النهارده ٢٠٠ قرش ..
- نجيب : ٢٠٠ إيه ؟ ..
- عبد الله : إن ما كانش النهارده يكون بكره ؟ ..

- نجيب : وان ما كانش بكره ؟ ..
- عبد الله : يكون بعده ..
- نجيب : دا كلام جميل .. لما انت تعرف تسمعنى الكلام الخلو
ده ساكت ليه من الصبح ؟ .. سبحان الله ! .. انزل
بقى خلىنى آخذ خمس دقائق استراحه ..
- عبد الله : (فى تردد) فيه موضوع تانى ..
- نجيب : موضوع مفرح من فضلك ؟ ..
- عبد الله : مفرح قوى ..
- نجيب : خير .. قل بسرعه ..
- عبد الله : الربع ريال لازمنى ضرورى ..
- نجيب : (ناظرًا شزرا) دا الموضوع المفرح قوى ؟ ..
- عبد الله : ما هو أصل أنا كنت الأول طالب من جنابك نص
ريال ، لكن بقى ..
- نجيب : لكن بقى مراعاة للحاله الحاضره عملت لى تنزيل ٥٠
فى الماية .. مفهوم ..
- عبد الله : أنا قلبى دايمًا على جنابك ..
- نجيب : أشكرك على إحساساتك ..
- عبد الله : (يشير إلى جاكته نجيب) اهرش جنابك فى جيب

- الجاكته ..
- نجيب : (ينهض ويخلع جاكته ويقذف بها إليه) خذ امرش
فيها بمعرفتك ..
- عبد الله : (يتلقاها ويبحث في جيوبها جميعها) اللي ما فيها
برغوت نقديه ! ..
- نجيب : (جالسًا) علشان تصدق ..
- عبد الله : (ينظر إليه في ارتياب) أmaal جنابك نازل بره دلوقت
ازاي ؟ ..
- نجيب : ومين قال لك اني نازل ؟ ..
- عبد الله : جنابك مش نازل النهارده ..
- نجيب : أنزل ازاي ؟ .. عينك كلها نظر ..
- عبد الله : يعنى جنابك حاتفضل محبوس هنا ؟ ..
- نجيب : قسمتى ..
- عبد الله : لحد إمتى ؟ ..
- نجيب : لحد ما تسلفنى انت ربع ريال ..
- عبد الله : كويس ا.. لأمش ضرورى بقى نزول جنابك ..
- اقعد لحد ما يفرجها الكريم من ناحيه تانيه (جرس
التليفون يدق) إياك ده الفرغ ..

- نجيب : (بلا حراك) عشم إبليس فى الجنة ..
- عبد الله : مين عارف ؟ ..
- نجيب : مش منظور إن مدير البنك الأهلى يطلبنى فى التلفون
علشان يقول لى أمرنا لك بخمسين جنيه ا.. على كل
" حال روح انت شوف مين ..
- عبد الله : (يتجه إلى التلفون) يا سيدنا الحسين ..
- نجيب : إن كان واحد من اياهم ارمى السماعه على طول ا..
- عبد الله : (يرفع السماعه) آلو .. آلو .. مين ؟ .. نجيب
بك ... حاضر (يلتفت إلى نجيب) دى واحده ست
عاوزه حضرتك ..
- نجيب : (ينتفض) ست .. (ينهض ويهرع إلى التلفون)
آلو .. أفندم .. آه .. هو انت يا سوسو ؟ .. نعم ..
عاوزه إيه ؟ .. ما بظهرش ؟ .. طبعا فيه سبب مهم ..
لأمش زعلان منك .. أنا زعلان من نفسى .. لأمش
نازل النهارده .. لأنى منحاش .. منحاش فى البيت ..
الى حايشنى ؟ .. سبب مهم .. (يبعد فمه عن البوق
ويخاطب عبد الله) أقول لها على السبب يا سى عبد الله
(يعود إلى التلفون) لأما اقدرش النهار ده ..

- متأسف .. أوفوار .. (يضع السماعه ويجلس وهو
يقول لعبد الله) صدقت ؟ .. قلت لك ده مش مدير
البنك الأهلى تقول لى لأ .. ما فيش فايده ..
- عبد الله : (بعد لحظة صمت) بقى ما فيش مع حضرتك ربع
ريال ؟ ..
- نجيب : (فى صبر عجيب) إن كان مع حضرتى ٣ صاغ كنت
نزلت .. عاوز أفهمك أكثر من كده ؟ ..
- عبد الله : (فى لحظة تفكير) جنابك برده تقدر تجبر بخاطرى ..
- نجيب : (فى اهتمام) ازاي بقا يا شاطر ؟ ..
- عبد الله : المطبخ فيه كروانة نحاس تساوى لها نصف ريال ..
- نجيب : بس كده ؟ ..
- عبد الله : وفيه كان لحوق كويس يجيب له ٧ قروش صاغ ..
- نجيب : كويس .. وانا آكل فى إيه ؟ ..
- عبد الله : فى اللوكانده ..
- نجيب : يا سيدى .. يا سيدى ااا ..
- عبد الله : محمد السفرجى طفش .. ومين اللى رايح يطبخ
لجنابك ؟ .. مفيش غير اللوكانده ..
- نجيب : (فى تهكم خفى) الكونتنتال اا ..
- (رصاصة فى القلب)

- عبد الله : اللى تستحسنها ..
نجيب : تعجبنى ..
عبد الله : وأكل اللو كانده على كل حال أحسن من تلكليك محمد
السفر جى اللى يقرف الكلب ..
نجيب : طبعاً .. لكن بقى يا فصيح اللو كانده دى بلاش
والا بفلوس ؟ ..
عبد الله : شكك لحد أول الشهر ..
نجيب : يا مسكين يا أول الشهر .. أول الشهر ده لو كان
جمل ، كان زمانه وقع من طولاه مغشياً عليه ! ..
عبد الله : وإيه الرأى بقى يا سى نجيب بك ؟ ..
نجيب : اللى تشوفه جنابك ..
(جرس التليفون يدق)
عبد الله : التليفون ! ..
نجيب : تعال شوف مين ..
عبد الله : (يمسك السماعة) آلو .. ؟ واحده ست برده ..
نجيب : عاوزه إيه دى كان ؟ .. هات ورنى (يأخذ
السماعة) آلو .. مين .. حسنيه ؟ .. أفندم ..
عاوزانى ضرورى ؟ .. مش ممكن .. ما اقدرش انزل

النهارده .. سبب مهم .. منحاش .. أبوه منحاش ..
برده لازم أجيلك حالا في تاكسى ؟ .. طيب انتظري
على التليفون لحظه (يلتفت إلى عبد الله) نصف ريال
سلف يا عبد الله بك ! ..

عبد الله : منين ؟ ..

نجيب : ابحت في أى حته .. لازمى ضرورى .. اعمل
معروف ..

عبد الله : تعمل به إيه جنابك ؟ ..

نجيب : أجرة تاكسى يا مغفل ..

عبد الله : أنا ورايا شغل مش فاضى ..

(يتحرك للانصراف)

نجيب : (ييصق نحه) ما انا برده عارفك تدل خسع ا ..

(وفي الحال يتجه إلى البلكون في الجهة اليسرى

ويقف ببابه ويرفع رأسه إلى أعلى ويصفر) يا

مصطفى .. يا مصطفى .. سيدك سامى لسه

ما رجعتش من العياده ؟ .. لسه ؟ .. طيب احذف لى

حالا نص ريال وحياة أبوك .. ما فيش ازاي ؟ .. نص

ريال واحد لا غير يا دون .. ما تعطينيش .. انخص

على اللى عملكم خدامين .. (يدخل يائسا) شيء
يجنن (يمسك السماعة) آلو .. اسمعى يا حسنيه ..
ما فيش فايده أبداً تعالى انت بتساكسى ..
مستحيل ؟ .. طيب يا عزيزى أورهوار ..
(يضع السماعة فى الحال ...)

عبد الله : خليك جنابك فى بيتك .. برده أحسن ا..

نجيب : (فى نظرة شزراء) أحسن فى إيه ؟ ..

عبد الله : جنابك كنت حاتدفع للتاكسى النص ريال اللى احنا
لسه مش عارفين نعتز عليه ا..

نجيب : طيب اسكت .. مش عاوز منك كلام ا.. قسما بالله
العظيم ما تنطق كلمه واحده زياده إلا أقوم أأكلك علقه
تساوى ٣٠ قرش ا..

عبد الله : ٣٠ قرش ا.. دى ولا أكلة الحباتى الكبابجى ا.. طيب
قابل ، بس ادفعهم ..

نجيب : تفضل انزل .. وخدها من قصيرها .. إلا انا دلوقت
العفاريت بتلعب قدامى ..

عبد الله : لأ .. ربنا يستر ..

(يشير بالسلام ويخرج)

نجيب : (يرمى على المقعد) ما فيش نزول خلاص .. أنا لازم
أعود نفسي على الوحده ، وأعمل زي غاندى واحتر
العالم كله اللي ماشى بالفلوس .. سوسو تجنى علشان
الفلوس ، حسنيه عاوزانى بالفلوس .. آدى الحياه
كلها .. فيها إيه غير كده .. وكذاب اللي يقول فيه
حاجه اسمها عواطف عند مخاليق الله المصنوعين من
وحل وطن ..

سامى : (يدخل فى اندفاع واهتمام) نجيب ؟ ..

نجيب : نعم .. مالك عاوز إيه انت لآخر ؟ ..

سامى : أنا .. أنا ..

نجيب : انطق امال ..

سامى : أنا وقعت من السما وانت تلتفتنى ..

نجيب : إمتى ده ؟ ..

سامى : دلوقت ..

نجيب : أبداً .. انت لو كنت وقعت دلوقت من السما كنت

سبتك تنكسر رقبتك ..

سامى : ما ترضاش .. أنا عارف قلبك وأخلاقك ..

نجيب : الغرض .. بالاختصار انت عاوز إيه دلوقت ؟ ..

- سامی : ما تكلمنيش باللهجه دى يا نجيب .. شجعنى شويه ..
- نجيب : أشجعك يعنى إيه ؟ .. شجع نفسك ، وتكلم انت وقول اللى عاوز تقوله ..
- سامی : أنا .. انت عارف انى خاطب فيفى ..
- نجيب : عارف ..
- سامی : طبعًا .. لسه مش خطوبه رسميه لغاية دلوقت ..
- إنما ..
- نجيب : زى بعضه ..
- سامی : لأ .. مش زى بعضه ..
- نجيب : المهم انكم بتحبوا بعض ..
- سامی : مش كفايه .. الخطوه المهمه والعقبه أهلها .. فيفى أولاً وارثه النهارده ، ومتوفر لها فى المجلس الحسى أكثر من ١٢ ألف جنيه .. وعائلتها كبيره معروفه ، وما اقدرش أقول لك ان كانوا يرضوا بواحد زى والا لأ .. خصوصًا أنا سمعت ان أهلها مشرطين مهر لا يقل عن ٨٠٠ جنيه وشبكة ٣٠٠ جنيه .. يعنى واحده زى دى تتكلف لها حوالى ١١٠٠ جنيه ..

- نجيب : وما له .. انت لك في البنك مبلغ وقدره ..
- سامي : كل رصيدي ألف جنيه لا غير ..
- نجيب : نعمه من الله ! .. فيه غيرك رصيده النهارده ما حصلش
٣ قروش صاغ ..
- سامي : لاحظ ان ألف جنيهه ما يعملوش حاجه يا نجيب ..
- نجيب : (في عهكم) أبداً ..
- سامي : أنا باكلمك جد .. انت أولا شفت فيفي .. بنت
شيك صحيح .. اللي زي دي لازم تعيش عيشه
« لو كس » انت شفتها والا لا فيفي ؟ ..
- نجيب : (مطرقا) أيوه ..
- سامي : إيه رأيك فيها بدمتك ؟ ..
- نجيب : (مطرقا) كويسه ..
- سامي : (في تحمس) مش كويسه بس .. جنان ..
- نجيب : (في صوت خافت) صحيح ..
- سامي : بشرفك لو كنت انت في مركزى مش تعيدها ؟ ..
- نجيب : (يرفع رأسه) إيه لزوم السؤال ده ؟ ..
- سامي : تعيدها والا لا ؟ ..
- نجيب : ما اجاوبش ..

سامى : انت حر .. لكن أنا أقسم لك ان فى ما فى زينا
اتدين فى مصر ..

نجيب : (مطرقا) ما حدش قال انك كذاب ..

سامى : بنت « سبور » مدهشه يا نجيب .. ساعات تسوق
عربيتها بنفسها .. عربيه « باكار » فخمه .. تصور
امبارح بالليل فى شارع الهرم كانت ما سكسة
الدركسيون بيد واحده وايدھا التانيه على كفى ..
وما شيين على ٨٠ كيلو ..

نجيب : (فى مرارة) وتدوس الغلابه المساكين ! ..

سامى : ذى شاطره .. ما تخافش عليها ..

نجيب : (فى نفس المرارة) طبعا .. الخوف على اللى يمشى فى
سكتها ..

(صمت)

سامى : (بعد لحظة صمت وتأمل) أنا احبها قوى يا نجيب ..

نجيب : وانا كان ..

سامى : (ينظر إليه) وانت كان ؟ ..

نجيب : أبوه .. أنا كان أشجعك على ذلك ..

سامى : (فى فرح) صحيح ؟ ..

- نجيب : وهي تحبك قوى يا سامى !..
- سامى : جدا ..
- نجيب : أنا .. أشجعها على ذلك ..
- سامى : انت بتكلم جد ؟..
- نجيب : ما فيش داعى انى أهزر ..
- سامى : تفتكر انى كفء لها ..
- نجيب : بالتأكيد ..
- سامى : ما تنساش ان كل ثروتي عباره عن الألف جنيهه الموضوعه فى البنك ..
- نجيب : من ساعة هى ما حبتك ارتفعت قيمتك وبقيت تساوى تقلك ذهب ..
- سامى : إزاي الكلام ده ؟..
- نجيب : من يوم أنا ما عرفت انها بتحبك وانت متمتع بكامل احترامى !.. لأول مرة أشعر بنحوك باحترام عميق !..
- سامى : (فى دهشة) للدرجه دى ؟..
- نجيب : آمال إيه ؟.. انت نايم ؟.. فوق لنفسك كده وافهم انك دلوقت حاجه تانيه يا ستين مغفل ..
- سامى : لأ ما تخفش .. أنا برضه فاهم لو تكون من قسمتى

حانقلب حاجه تانيه صحيح وألعب بالذهب لعب ؛
١٠٠٠٠ جنيه نقديه في الزمن ده حاجه توهم .. غير
العقارات .. علشان كده أنا بقول دي فرصه ..
خايف تطير من يدي ..

نجيب : (ييصق) إخص ا! .. صحيح انك منحط ا! .. انت
مش عارف أبدا تخليني احترمك خمس دقائق على
بعض ا! ..

سامي : ليه ؟ .. حصل مني إيه ؟ ..؟

نجيب : انت مش فاهم وبس .. مش ممكن واحد زيك
يفهم ..

سامي : إيه بس اللي حصل ؟ ..؟

نجيب : حصل انك فاكرها بيعه وشروه وأوكازيون خايف
يضيع منك .. برضه انت حكيم سوقى تجارى ..

سامي : بقى اسمع با نجيب ، أنا مش جاي لك دلوقت علشان
تهزأنى ..

نجيب : آمال جاي لى علشان إيه ؟ ..؟

سامي : جاي لك علشان تساعدنى ..

نجيب : أساعدك في إيه ؟ ..؟

- سامي : تساعدني بكل قوتك .. وتنقذني بأي وسيله ؛ لأنني
رايح اقع من السما وانت ..
- نجيب : انتظر شويه من فضلك قبل ما تقع من السما .. وضح
لي المسأله علشان أشوف ان كنت اقدر استلقاك
والا ما اقدرش... ..
- سامي : طبعا المسأله واضحه .. أهلها يستحيل يتنازلوا عن
أقل من ألف و ٢٠٠
- نجيب : وبعدين ؟ ..
- سامي : وانا مش عاوز أظهر بمظهر الضعف والفسر
والاحتياج .. يعني لازم أدفع فوراً اللي يقولوا عليه من
غير تردد أو بماطله ..
- نجيب : كويس ..
- سامي : وانت عارف ان اللي معاه ألف بس .. يعني لازم
٢٠٠ قول ١٠٠ علشان أهون عليك .. وانا ابقى
اتدبر في الـ ١٠٠ الثانيه ..
- نجيب : أنا مش فاهم ..
- سامي : بالاختصار أنا أرجوك تسلفي ١٠٠ جنيه دلوقت
حالا ..

- نجيب : دلوقت حالا ؟ ..
- سامي : أيوه .. لأنى ناوى أقدم الشبكه والمهر وكل حاجه
بكره قبل ما حد يعطل الشغله ..
- نجيب : بقى انت جاي لى علشان أسلفك ؟ ..
- سامي : حالا ..
- نجيب : آه ..
- سامي : سكت ليه ؟ .. تبص لى كدا ليه ؟ ..
- نجيب : أنا قاعد افكر مش لاقى ..
- سامي : الفلوس ؟ ..
- نجيب : مش لاقى رد كافي شافى يترد به عليك ..
- سامي : ليه ؟ ..
- نجيب : عاوز تستلف منى ١٠٠ قرش ؟ ..
- سامي : ١٠٠ جنيه ..
- نجيب : (يضحك ثم يضحك) ..
- سامي : أنا مستعد اكتب لك بالمبلغ كمبياله ..
- نجيب : (يضحك ثم يضحك) ..
- سامي : بتضحك ليه بس ؟ .. هو دا وقت ضحك يا
نجيب ؟ ..

- نجيب : آمال إمتى وقت الضحك ؟ .. (وينهض ويصبح)
أيتها السموات اضحكى .. أيتها الغرفة اضحكى ..
أيها الصندوق اضحك .. أيها البواب عبد الله اطلع
حالا وضحك (لسامى) واحد من أمرين إما إنك
تعبان شويه ، ويستحسن إني أطلب لك إسعاف
بالتليفون ينقلك إلى مستشفى الأمراض العقلية ،
وإما إني أنا اللي تعبان شوية ؛ لأنى أحتكم على
١٠٠ جنيه نقدًا وعدًا بدون علمى ، وقاعد منحاش
فى البيت مع إني باسلف الناس بكميالات ..
- سامى : (يجذب نجيب من جاكته) أرجوك تقعد ..
نجيب : سيبنى أتكلم وأقنع نفسى أولاً ..
سامى : اقعد يا نجيب اعمل معروف ..
نجيب : (يجلس) قعدت ..
سامى : يظهر انك مش فاهم الموضوع ..
نجيب : ده مؤكد .. إنى أنا فهمت غلط خالص ..
سامى : المسألة مستقبل .. ولذلك أنا أتوسل إليك يا نجيب ..
فاهم ؟ .. أنا أتوسل إليك ..
نجيب : العفو .. علشان إيه بس ؟ ..

- سامى : تشوف لى ١٠٠ جنيه ..
- نجيب : برده .. (صائحا) ياراجل اعقل .. اعقل والا أقسم بالله العظيم أتكلم فى التليفون ينقلوك فى الحال ! .. دا انا لسه يا بارد ما فيش خمس دقائق مصفر لك فى البلكون علشان تحدف لى نصف ريال .. تقوم تجينى دلوقت تطلب منى ١٠٠ جنيه ؟ ..
- سامى : انت يا نجيب شخصيه معروفه فى جميع الأوساط والنوادر الكبيره ..
- نجيب : (يلتفت إليه بسرعة) يعنى إيه ؟ ..
- سامى : يعنى إنك شخص ما حدش يرفض لك طلب ..
- نجيب : دا صحيح .. لكن قبل كل شىء أنا شخص معروف عند الناس كلها ان لى كرامه ..
- سامى : انت سالف من مارسيل البارمان ٢٠ جنيه ..
- نجيب : مارسيل وأمثاله عارفين طيب إن الـ ٢٠ جنيه يقبضوها منى ٤٠ لما تيجى الفرص المناسبه .. ومن هنا لغاية ما تيجى الفرص المناسبه ما اقدرش أظهر نفسى لجنس مخلوق ...
- سامى : يعنى ما تقدرش تساعدنى يا نجيب بأى طريقه ؟ ..

- نجيب : في الحاله الراهنه لأ ..
- سامي : ما تقدرش تستلف لى من تحت الأرض ؟ ..
- نجيب : لو كان تحت الأرض فيه ناس بتسلف ما كنتش انتظرت لما تفكرنى حضرتك ..
- سامي : (ينظر فى الصالون) أنا كنت أعتقد انك تقدر ..
- نجيب : أرجوك ما تبصش كثير لطقم الصالون ده ؛ لأنه لسه مش مدفوع ثمنه ومنظور ينحجز عليه من يوم للتانى ..
- سامي : يعنى ما فيش فايده منك ؟ ..
- نجيب : عينك كلها نظر ..
- سامي : (فى يأس) يا خساره يا فيفى ..
- نجيب : (بعد لحظة إطراق) طبعا حانزعل هى كان لو حصل مانع ..
- سامي : بالطبع ..
- نجيب : أيوه .. من غير شك ..
- سامي : أيوه ..
- نجيب : أيوه (لحظة) وانت ماتقدرش تصارحها بالمبلغ اللى ممكن تدفعه ؟ ..

- سامى : مستحيل .. أنا لازم أفهمها انى عريس كسفاء
متيسر ..
- نجيب : وليه تغشهم ؟ ..
- سامى : الزواج كله كده دلوقت ..
- نجيب : أيوه (لحظة صمت وهو مطرق) المهم هو الخب ..
- سامى : علشان كده زواجنا لازم يتم ؛ لأننا بنحب بعض ..
- نجيب : (فى صوت منخفض غريب) إن شاء الله يتم ..
- سامى : (فى أمل) إزاي ؟ .. لقيت فكره ؟ .. الحقنى اعمل
معروف أنا أبوس رجلك ، انقبذنى ..
- نجيب : عندى فكره واحده ..
- (يفكر)
- سامى : قول أنا فى عرضك ...
- نجيب : (يفكر) ما فيش غير ..
- سامى : (مهتما) غير إيه ؟ ..
- نجيب : خاتم الملك ..
- سامى : (ناهضا) ونلقاه فىن ده ؟ ..
- نجيب : موجود .. (يفتح درجا ويخرج خاتما من الماس)
خذ ..

- سامى : (يتناول الخاتم بتردد) لكن ..
- نجيب : إيه ؟ .. ما ينفعش ؟ ..
- سامى : إديني عقلك .. ما ينفعش ازاي ؟ .. دي حاجه فخمه
قوى .. الله يرحمها الست صاحبة العصمه
والدتك .. انت يظهر كنت ابن ناس طيبين في
زمانك ..
- نجيب : هات بقى سيجاره وروح ارهنه أو شوف لك فيه
طريقه ..
- سامى : (في تردد وهو يتأمل الخاتم) لكن لأ يا نجيب .. ما
اقدرش ! .. أنا بأى حق اسمح لنفسى بالتصرف في
تذكار عائلي زي ده ؟ ..
- نجيب : مش مهم ! ..
- سامى : أنا أعتقد ان ده تهجم منى عليك زياده عن اللزوم ، ولا
أجرؤش انى أقبل كرمك الغريزي المدهش ده ..
- نجيب : تجرأ واقبل ، وروح بسرعه رتب أمورك ..
- سامى : على كل حال يا نجيب أنا ما قدرش اشكرك .. لأن
عملك مش من الأعمال اللى تشكر عليها بكلمه
أو كلمتين .. وان قلت لك مرسى أو متشكر لعمل
(رصاصة في القلب)

زى ده أبقى بارد .. انت بالتأكد أنبل وأكرم
وأظرف وأشرف شخصيه خلقها ربنا ..

نجيب : رح بقى ما تبقاش ابن كلب رزل .. دوشتنى ..
سامى : طيب أنا طالع بقى يا نجيب أغسل وشى وأغير ؛ لأنها
جايه دلوقت لأول مرة تنفرج على الشقه .. أورفوار
مؤقتا ..!

نجيب : أورفوار ..
سامى : بكرة أشوفك ضرورى علشان أقول لك أنا عملت
إيه ؟ ..

(خارجا)

نجيب : (يصيح به) اسمع ...
سامى : (يلتفت إليه) نعم ..
نجيب : معاكش نص ريال سلف ؟ ..
سامى : (فى حركة حماسية يخرج محفظته) يا سلام
يا نجيب .. خد المبلغ اللي انت عاوزه .. جنينه ..
خمسه .. عشره ..

نجيب : باقول لك نص ريال ..
سامى : بس كده ..

(يعطيه نص ريال)

نجيب : أيوه بس نص ريال .. افهم عربي .. مش طالسب
غيره .. هات كان سيجاره .. ولع لي .. بس رح بقى
ابعد عنى .. تبارك سعيد ..

(سامى يخرج ... نجيب يظل وحده على مقعد مفكرا
يدخن)

(جرس الباب يرن)

(نجيب ينهض بسرعة .. ثم يسرع إلى الطاولة
ويدخل الصندوق)

(فىفى تنقر على باب الصالون وإذ تجده خاليا تقدم
فى تردد ...)

(وتجلس على مقعد ثم تتلمل وتنادى)

فىفى : ما فيش حد هنا .. سامى ...

نجيب : (يرفع غطاء الصندوق ، أى المتضدة ويظهر
رأسه) ..

فىفى : (تراه فى الصندوق خارجا فتصرخ فى رعب)
آه ! ..

نجيب : (خارجا من الطاولة) لا مؤاخذه .. باردون ..

فىفى : نجيب بك ..

- نجيب : أيوه .. أنا نجيب ..
- فيفي : (ضاحكة ومشيرة إلى الصندوق) وعامل في نفسك كده ليه ؟ ..
- نجيب : مش مهم .. أولا أنا أحب أعرف سبب تشريفك هنا ..
- فيفي : وأنا أحب أعرف صفتك إيه هنا ؟ ..
- نجيب : بقى حضرتك كل ما تقبليني في حته تقولى لى صفتك إيه ؟ ..
- فيفي : طبعًا .. أسألك عن صفتك هنا بالحاله دى ..
- نجيب : صفتى زنى فى محل سكنى ..
- فيفي : (فى دهشة) دا محل سكنك .. أمال سامى فىن ؟ ..
- نجيب : شقة سامى فوق .. حضرتك غلطتى فى الدور ..
- فيفي : آه .. صحيح .. باردون .. طيب أما أقوم اطلع بقى .. قبل كده مش تحب تقول لى انت كنت مستخبي ليه كذا ؟ ..
- نجيب : احتياطيا بس .. علشان ما اقابلش بعض الناس غير المرغوب فيهم ..
- فيفي : زى مين ..

- نجيب : ناس كثير يطول شرحهم ..
فيفى : أنا منهم ؟ ..
نجيب : انت ؟ ..
فيفى : قول بصراحه ..
نجيب : ما اقدرش اقول لك ..
(فيفى تمتعض قليلا لهذا الجواب)
فيفى : مرسى .. وعرفت ازاي اتى جيت ؟ ..
نجيب : علشان ضربتى جرس الخطر ..
فيفى : جرس الخطر دا ايه ؟ ..
نجيب : جرس الباب .. لأن كل واحد يضرب الجرس معناه
عندنا إنه غريب عن البيت ، أقوم أنا فى الحاله دى
أدخل الغواصه ..
(يشير إلى المنضدة)
فيفى : (تنظر إلى المنضدة التى على شكل الصندوق)
الغواصه ! ..
(تضحك)
نجيب : آمال .. احنا دلوقت فى حالة حرب .. ودخول
الغواصه ضرورى علشان لو دخل حد من الأعداء

- يلاقى الشقه ما فيهاش مخلوق يقوم يتقهقر بانتظام ..
- فيفى : (باسمه) والمعارف .. دول الحلفاء طبعًا يدخلوا على طول من غير ضرب الجرس ...
- نجيب : طبعًا .. ولذلك الباب دايمًا مفتوح .. والحلفاء عندهم تنبيه بعدم ضرب الجرس ..
- فيفى : أنا متأسفه اللي أزعجتك ودخلتك الغوصه من غير سبب .. ما كنتش أعرف .. على كل حال اعتبر انك كنت بتعمل مناوره .. إنما اسمح لي أقول لك ان دى طريقه غريبه .. تفتكر ان فيه ناس كثير عاملين صناديق وغواصات زى دى علشان ما يقابلوش حد ؟ ..
- نجيب : ما أظنش ..
- فيفى : اشمعنى بقى انت اللي عجيب فى أطوارك ؟ ..
- نجيب : علشان ربنا خلقنى كدا ..
- فيفى : أنا ملاحظه ان أعصابك النهارده مرتاحه ..
- نجيب : الحمد لله ..
- فيفى : إنما دا ما يمنعش إنك تكره الست اللي بتاكل جلاس عند جروبي زى ما تكره فاتوره الحساب تمام ..

مش كدا ؟ ..

نجيب : أرجوك ما تفكرنيش بفواتير الحساب ..

فيفي : ولا بالست اللي انت تكرهها ؟ ..

نجيب : لاحظي سيادتك أن سامي منتظر فوق ..

فيفي : أنا طالعه حالا .. انت متضايق من وجودي ؟ ..

نجيب : أنا ما قلتش كدا ..

فيفي : باين في عينيك انك متضايق ..

نجيب : وهو كذلك ..

فيفي : علشان كده أسيبك .. أوقفواري ..

نجيب : أوقفواري ..

فيفي : (تتحرك إلى الباب فترى الجرامفون في طريقها

فتقف) دا الجرامفون بتاعك ؟ .. عندك أسطوانات

جديدة طبعًا .. على فكره .. أما امبارح سمعنا في مينا

هوس دور جديد في الجازيانند بديع قوى .. اسمه ..

نسيه .. دلوقت أسأل لك سامي عن اسمه .. أنا

امبارح سقت البكار بنفسي ..

نجيب : عارف .. في شارع الهرم .. الدر كسيون بيد واحدة

سرعة ٨٠ كيلو ..

- فيفي : سامي قال لك ..
نجيب : طبعًا ..
فيفي : بقي سامي لازم يقول لك كده علم كل شيء ؟ ..
نجيب : صاحبي ..
فيفي : على فكره .. إيه رأيك في سامي ؟ ..
نجيب : رأيي في سامي إنه شاب مدهش ..
فيفي : أنا مش شايفاه مدهش في حاجه أبدًا ..
نجيب : أستغفر الله .. اسمحي لي أقول لك انك غلطانه
قوى .. انت عاوزه أحسن من كده إيه في الدنيا ؟ ..
شاب لطيف .. حكيم كويس .. فلوس عنده في
البنك .. مالوش دايين يطالبه بقرش أو يزعبه بفاتورة
حساب .. وفضلا عن كده .. يبحبك ..
فيفي : يبحبني ؟ ..
نجيب : يعبدك ..
فيفي : مين كان غيره يبحبني ؟ ..
نجيب : ما فيش غيره ..
فيفي : انت كذاب ...
نجيب : مش عاوزه تصدقني .. انت حره ..

- فیفی : طیب بص فی وشى .. حط عینک فی عینی ..
- نجیب : لا لا لا .. اعملی معروف ما فیہش داعی ابدأ انی أبص
فی وش حضرتک ولا احط عینی فی عینک ..
- فیفی : شوف انت خفت من عینی ازای ؟ ..
- نجیب : ما علیہش ..
- فیفی : قل لی یا نجیب ..
- نجیب : ما شاء الله ..
- فیفی : إیہ ؟ ..
- نجیب : نجیب کدا حاف !.. لا نجیب أفندی .. ولا نجیب
بک .. ولا حتی سی نجیب .. حضرتک واخذہ
راحتک معایہ فی الکلام زیادہ عن اللزوم ..
- فیفی : (فی امتعاض) کدا ؟ ..
- نجیب : انت مش ملاحظہ ؟ ..
- فیفی : کنت افتکر انک « سبور » ..
- فیفی : اللى قال لك کدا غشک ..
- فیفی : کنت افتکر ان لی الحق اعاملک من غیر تکلیف
بصفتک صاحب سامی الحمیم .. ومع ذلك أنا
حاحسر إیہ ؟ .. تحب أقول لك یا نجیب باشا ؟ ..

نجيب : أحب تقول لي « جود باي » .. بس وتسييني في
حالي ..!

فيفي : إنت النهارده وحش صحيح ..

نجيب : طول عمرى كده .. (يتناول سماعة التليفون
بسرعة) آلو .. مين .. سوسو .. اسمعى .. أنا لازم
اقابلك النهارده .. وهو كذلك .. بعد عشر دقائق
أكون عندك .. نروح فين ؟ .. زى ما يعجبك
انت .. أورفوار مؤقتًا ..

(يضع السماعة)

فيفي : (في مرارة) دى واحده ست ..

نجيب : أظن كدا ..

فيفي : أنا دلوقت فهمت ..

نجيب : فهمت إيه ؟ ..

فيفي : فهمت انك نسيت بالعجل الست بتاعة جرونى ..

نجيب : الحمد لله اللى فهمت كدا ..

فيفي : (تنصرف) نهارك سعيد ..

نجيب : (بلا حراك) نهارك سعيد ..

(فيفى تخرج .. ويبقى نجيب لحظة جامدًا ثم يرتقى

على مقعد ويضع رأسه بين يديه ...)

الفصل الثالث

(عين منظر الفصل الثاني .. أى شقة
نجيب .. نجيب واقف بقرب الجراموفون
يسمع أسطوانة (La petite Tonkinoise)
لجوزفين بيكر وهو يتحرك كأنه يرقص على
أنغامها .. ولا تكاد الأسطوانة تصل إلى
ربعا حتى يدخل سامى ..)

- سامى : (فى اهتمام واندفاع) نجيب ! ..
نجيب : (يشير إلى الأسطوانة) هس ! .. اسمع النغمه
دى ! ..
سامى : المسأله مهمه قوى .. فضك من البتاع ده دلوقت ..
نجيب : (يوقف الفونوغراف فى تبرم) هه ! .. مالك بقى
ياسيدى .. ادوشنى وقل مزاجى ! ..
سامى : شوف يا نجيب .. المسأله انى أنا وقعت من السما ..
نجيب : وانا تلقفتك .. ما عندكش شغل أبدا غير انك تقع من

- السما ؟ ..
- سامى : الحقيقة انهم مسألتي مش مسأله ا ..
- نجيب : كان ا ؟ ..
- سامى : أولا الخاتم الألباس بتاعك ..
- نجيب : ماله ؟ ..
- سامى : راح ..
- نجيب : راح ازاي ؟ .. يخرب بيتك ..
- سامى : راح من إيدك .. من إيدينا .. لأنى خلاص قدمته
شبكة لفيفى ا .. وانت إذا كنت تحب اكتب لك به
كمبياله بأى مبلغ يعجبك يدفع على أربع سنين كان
بها .. وإذا كنت تحب تشنقنى اشنقنى .. أنا بين
إيدك واللى تعمله اعمله ا ..
- نجيب : تذكر أمى يا جدع انت ا ..
- سامى : أنا غلطت ووريت لفيفى مسكت فيه .. اضطريت
أقول لها انه الشبكة ا .. ونسيت ساعتها انه تذكر
أمك .. (يستدرك) والدتك ا .. الحقيقة انه خاتم
مدهش يا نجيب .. كل من شافه يستعجب ا ..
ما فيش بضاعة زى دى دلوقت عند الجواهرجيه ا ..

- نجيب : وأهلها قالوا إيه ؟ ..
- سامي : فرحوا طبعًا .. وبقوا يوروه لعارفهم .. أنا قلت لهم
تمنه ٦٠٠ جنيه .
- نجيب : ده اللي ينتظر منك ..
- سامي : أبدًا .. الواقع انه يساوى كده برده .. عند نجيب
الجواهر جى خاتم ما يجيش ربهه مكتوب عليه ٣٠٠
جنيه ! ..
- نجيب : انت لو كنت رهنته على ١٠٠ أو ٢٠٠ جنيه ما كنتش
حاتقدر تقدم شبكه بالعظمه دى ! ..
- سامي : ما هو ده نفس اللي انا شفته برده ! ..
- نجيب : احترموك طبعًا .. ورقبتك بقت أطول من البساب
ده ..
- سامي : طبعًا ..
- نجيب : وخطيبتك مبسوطه بالتأكيد ..
- سامي : فيفى حاتطير به طيران .. لابساه فى اصبعها ودائره
تفرجه للناس ! ..
- نجيب : (فى صوت خافت) دا المهم ! ..
- سامي : (بعد لحظة فى تردد) لكن بس ..

- نجيب : (يرفع رأسه نحوه) إيه بقى ؟ ..
- سامى : (فى تردد) انت مش زعلان يا نجيب ا... ..
- نجيب : علشان إيه ؟ ..
- سامى : علشان الخاتم ضاع .. لأنه لو كان اترهن على أى مبلغ ، كان برده على الأقل فيه أمل انه يرجع لك فى أى وقت ا... لكن دلوقت ما فيش أمل أبدا .
- نجيب : طيب وعاوز منى إيه بقى دلوقت ؟ ..
- سامى : ولا حاجه .. انت اللي عاوز منى ا... ..
- نجيب : عاوز منك إيه ؟ ..
- سامى : من حقتك إنك تزدربنى على الأقل وتحتقرنى ، لألى زودتها خالص ا... ..
- نجيب : مش فاضى انا دلوقت أحتقرك ..
- سامى : سكوتك يا نجيب بيخوفنى ..
- نجيب : ما تخافش ..
- سامى : ضميرى بيوبخنى ..
- نجيب : وآخرتها معاك بقى ؟ .. انت عارف انا ماليش ثقل على الفلسفه .. ضميرك يوبخك ، ويهزأك ، يرقعك بالصرمه ، أنا دخلى إيه ا... ..

- سامى : طيب ..
نجيب : آدى مسأله فانت .. إيه بقى المسأله التانيه ؟ ..
سامى : المسأله التانيه ..
نجيب : انطق ..
سامى : كتب الكتاب ..
نجيب : ماله ..
سامى : كان غرضي يتم في أقرب فرصه ..
نجيب : وجرى إيه ؟ ..
سامى : فينى مصهينه شويه وقاعده تماطل وتمطوح ..
نجيب : وإيه السبب ..
سامى : مش قادر أفهم ..
نجيب : من إمتى الكلام ده ؟ ..
سامى : أخيراً ..
نجيب : طيب وانت مستعجل على إيه ..
سامى : ازاي .. انت عبيط ؟ .. لازم تنتهى بسرعه قبل ما
يخلصوا منى القرشين (نجيب ينظر إليه شزراً)
بتيص لي كده ليه ؟ .. مش عاجبك كلامى ؟ .. أنا
شايف انى باتكلم بعقل ..

- نجيب : بعقل زياده عن اللزوم ..
- سامي : أصل الموضوع ده بالذات عايز كده ا..
- نجيب : بالعكس ..
- سامي : إنت مش فاهم مركزي يا نجيب .. أنا أقل واحد تجراً
انه يخطب فيفي ا.. دي تقدموا لها أكبر ناس في مصر
ورفضتهم .. إنت نايم ؟ .. دي معروفه في البلد كلها
انها لقطه وحيده ، اللي ينولها كأنه نال ..
- نجيب : (في تمكّم) البنك الأهلي ا..؟
- سامي : السعاده في الدارين ا..
- نجيب : دا صحيح ا..
- سامي : ولذلك أنا عايز اطمنن ..
- نجيب : طبعا ا..
- سامي : عايز اعمل كل جهدي إن كتب الكتاب ينتهي في
ظرف أسبوع ..
- نجيب : أسبوع ا..؟ هو الزواج سلق بيض يا حضرة
الأفندي ، والا هي العبارة نهب ا.. اهدا وابرد
وتعفف شويه ا.. انتم ليه كده ناس بطالين
شباحين ا.. الدنيا بخير والله الحمد .. ولا حدش

- يموت من الجوع .. وانت عندك ألف مدعوق
مصرى فى البنك ! ..
- سامى : يعنى تفضل انى أترك لهم حرية تحديد اليوم اللى
يعجبهم ؟ ..
- نجيب : بالتأكيد ! ..
- سامى : فكره .. برضه علشان ما اظهرش قدامهم بمظهر
اللحوح الملهوف ! ..
- نجيب : ما فيش عندك غير انك تظهر بالمظهر ! برضه تفكر
مش عاجبنى أبدًا !
- سامى : ليه ؟ ..
- نجيب : أنا والله خايف انك ماتستحقش عروسه جميله زى
دى ! ..
- سامى : (لى قلق) ازاي ؟ .. لأ .. ماتخوفنيش امال ! ..
- نجيب : ما عندكش عواطف أبدًا ..
- سامى : (يتنفس الصعداء) لأ .. عندي .. اطمئن ..
العواطف دى موجوده دايما فوق البيعه ! ..
- نجيب : البيعه ؟ .. شوف برضه ألفاظك مش عاجباني ! ..
- سامى : (يصيح) وبعدين بقى .. انت حاتطير لى برج من
(صاصة فى القلب)

عقلي .. جاتك البلا .. سمج ا.. أنا مش ضرورى
أعجبك انت .. أنا ما دمت عاجب فيفى طظ في
حضرتك وفي الدنيا كلها ا..

نجيب : (يطرق) أنا كل قصدى انك تعجبها ا..

سامى : عاجبها غصب عنك ا..

نجيب : دا المهم ..

(صمت .. ينهض ويتجه إلى الجرامفون ليدير
الأسطوانة)

سامى : بلاش فونوغراف دلوقت .. اعمل معروف خلىنا
نتكلم شويه ا..

نجيب : عاوز منى إيه كان ؟ ..

سامى : ولا حاجه ا..

نجيب : طيب خلاص بقى اعتق رقبتى ا..

سامى : ما تخافش .. خلاص عتقتك .. أنا كان غسرضى
اسألك عن أحوالك انت ا..

نجيب : أحوالى أنا عال قوى .. كتر خيرك ا..

سامى : على فكره .. الست اللي كنت قابلتها في جروبي بتاكل
جلاس ووقعت في حبها ا.. ما فيش خبر عنها أبدا ؟ ..

- نجيب : لأ ..
- سامي : أنا متأسف إني غرقان لشوشتي في مسألة فيني زي
ما انت شايف .. وإلا انا كنت حالا شفت لك
طريقه !..
- نجيب : ممنون ..
- سامي : وأحوالك الماليه ماشيه ؟..
- نجيب : أحوالى الماليه فتحت بصعود ه بنط وقفلت بنزول
بنطين !..
- سامي : هى إيه ؟..
- نجيب : اليورصة !..
- سامي : بورصة إيه ؟..
- نجيب : أعمل لك إيه ؟.. حضرتك بتسألنى إذا كانت أحوالى
الماليه ماشيه ؟.. أقول لك إيه بس ؟.. شىء يجنن ؟..
تاجر أقطان أنا فى بورصة مينا البصل ؟.. من إمتى
كان لى أحوال ماليه ماشيه والا قاعده ؟..
- سامي : أنا غرضى أسألك عن الحجز المتوقع على عفشك لسه
ماشى والا ..
- نجيب : طبعاً ده ماشى .. أمال حايروح فين ؟..

- سامى : وإمتى تحدد يوم البيع ؟ ..
نجيب : ما اعرفش .. اسأل عبد الله البواب .. هو اللى تعين حارس ا .
- سامى : على الله من هنا ليوم البيع يجي لك قرشين ..
نجيب : منين يبجو القرشين .. ما دام ما انفتحت لناس الجيوب ولا القلوب ا ..
- سامى : طبعا انت عارف ظروفى صعب ا ..
نجيب : جدا ..
- سامى : على كل حال ربنا يفرجها من فضله ..
نجيب : والله أنا فى غاية الخجل من ربنا .. لأنه سبق فرجها كثير من فضله ا
- سامى : (ينهض للانصراف) مش كثير عليه المره دى كان ..
نجيب : انت قايم ؟ ..
- سامى : أبوه .. علشان ورايا ميعاد ا
نجيب : مع خطيبتك طبعا ..
- سامى : بالطبع مع فىنى ا ..
نجيب : طيب .. مع السلامه ..
- (سامى يخرج بعد أن يجيب بإشارة ...)

- (نجيب ساهم بلا حراك لحظة)
- عبد الله : (يدخل ومعه ورقة) سيدى نجيب بك ا..
- نجيب : أفندم ..
- عبد الله : النهارده كام فى الشهر ؟..
- نجيب : (فى ارتياح) ليه بقى الله لا يسيتك ا..
- عبد الله : لأ .. ما فيش حاجه .. ما تخافش ..
- نجيب : ما انتش جايب وراك مصيه النهارده ؟..
- عبد الله : لأ .. ما فيش لا سمح الله مصايب .. واحنا مالنا
وماها .. شر بره وبعيد ا..
- نجيب : آمال الورقه اللي فى إيدك دى إيه ؟..
- عبد الله : لأ .. دى لسه ما جاش وقتها ا..
- نجيب : الحمد لله ..
- عبد الله : روق بال جنابك ..
- نجيب : أصل انت دائما تيجى تطلع على جتى البلا من غير
مناسبه !..
- عبد الله : لأ .. خلاص ان شاء الله ما يجيش على قلوبى
إلا الخير ..
- نجيب : طيب يا سيدى .. عشمنا كده برده ..

- عبد الله : الغرض وما فيه .. أنا كنت عايز أقول لحضرتك ا..
- نجيب : إيه .. إياك انت جاي طالب منى فلوس ؟ ..
- عبد الله : برده ما اقدرش أكذب حضرتك فى دى ا.. لكن
بقى ا..
- نجيب : لكن بقى إيه ؟ .. أنا كان أملى تطلعنى مره كداب فى
دى ..
- عبد الله : على كل حال دى مسأله مش مهمه دلوقت ..
- نجيب : أيوه كده اععمل معروف .. فضلنا من المسائل اللى مش
مهمه ا.. انت كنت طالع ليه بالضبط ؟ ..
- عبد الله : هو النهارده مش ۱۲ فى الشهر ؟ ..
- نجيب : النهارده ۱۴
- عبد الله : (صائحا) ۱۴ فى الشهر ؟ .. يا خير اسود ا..
- نجيب : (فى هلع) اسود ازاي ؟ ..
- عبد الله : النهارده مصيبه مستنظرانا ولا احناش دارين ا..
- نجيب : قلت لك كده تقول لى ما فيش مصايب النهارده ا..
- إيه بقى يا سيدى قول ؟ .. تكلم .. موتنى .. هات
خبرى بالعجل ا..
- عبد الله : المحضر كان قال إن يوم البيع ۱۴ الشهر ده ا..

- نجيب : ١٤ أبريل ..١
- عبد الله : جنابك مش عارف ..٢
- نجيب : أعرف منين ..٢
- عبد الله : أنا سلمت لجنابك صورة من ورقة الحجز زى دى ..
(يقدم الورقة ...)
- نجيب : وانت فاهم انى لاقى نفسى علشان اقرا محاضر ججز
وافور دمي قبل الميعاد ..٢
- عبد الله : طيب تحد جنابك استقرا الورقه دى ، وشوف يمكن
احنا غلطانين ..
- نجيب : هات يا سيدى ورينى ..
(يتاولى الورقة وينشرها ويقرأ الآتى :)
- محضر حجز تنفيذى .. إنه فى يوم الأحد ٢ مارس سنة
١٩٣٢ الساعة ٤٥ / ١٠ أفرنكى صباحا .. بناء على
طلب الخواجات جبران سعد الله وإخوته المتخذين لهم
محلا مختارًا مكتب حضرة حامد فرغلى أفسدى
المحامى .. وبالاطلاع على صورة محضر الحجز
التحفظى الرقم ٧ فبراير سنة ١٩٣٢ المحكوم بشيئته ،
وعلى الحكم الصادر غيايبا من محكمة مصر الأهلية فى

القضية المدنية نمرة ٤٨١٦ سنة ١٩٣٢ المشمول
بصيغة التنفيذ والنفاذ ، ومعلن قانونا وموكل لنا
بتنفيذه .. أنا عبد الحميد قزمان محضر محكمة مصر
الأهلية وصلت إلى شارع قصر النيل وبمساعدة شيخ
القسم قد تواجدت بالمسكن استئجار المدعى عليه
نجيب أفندي إحسان فلم أجده ، ونهت على تابعه
بواب العمارة عبد الله محيس المقيم معه في معيشة
واحدة بدفع مبلغ ٥٦٨٠ قرشا قيمة المحكوم به
والمصاريف وأتعاب المحاماة .. فأجاب أن المدعى عليه
غائب ، ولعدم الدفع دخلت العين المؤجرة وأوقعت
الحجز التنفيذي على الآتي :- عدد ١ ترايبزة وسط
خشب أبيض بأربعة أرجل مستعمله سليمة .. عدد ١
كنصول خزران وعليه رخامة بيضاوى سليمة ..
عدد ١ بساط قطيفة مبرد ٤ × ٥ .. عدد ٣ براقع
ستائر خشب مشجر بحلية قطيفة .. عدد ١٢ كرسي
خزران بيويه بنى ٤ عدد ١ سرير خشب بلدكان بيويه
بيضه وعليه مله خشب بسلك وثلاث مراتب نوم
بوجه تيل مقلم حشو قطن ومخدتين نوم بوش ستائيه

أخضر ، ولخاف ستانيه بمبه .. عدد ٤ حلل نحاس
بغطاهم من فوق بعض وزن الجميع ١٥ رطل .. عدد
١ أنجر نحاس أربعة أرطال .. (نجيب يقطع القراءة
ويلتفت إلى عبد الله في فرح) ده نسيوه ؟ ..

عبد الله : نسيوه ازاي ؟ .. محجوز عليه برده .. استقرا جنابك
ضهر الورقة تلاقى بقية القايمه ..

نجيب : (يقرأ) عدد ٦ كنبه وفوتيل وكراسي صالون ..
عدد ٣ طاولة كبيرة وصغيرة .. وعدد ١ فونوغراف
ماركة جرامفون وعشر أسطوانات أفرنجية وعربية
مستعملة سليمة .. (نجيب يقطع القراءة ويلتفت
إلى عبد الله) حتى الجرامفون والأسطوانات يا عبد
الله ؟ .. دول قشطونا تمام .. وجردونا وخربسوا
بيتنا ..

عبد الله : استقرا .. استقرا .. لسه كان ..
نجيب : (يقرأ) عدد ١ دولاب ملابس بضلقتين ويمرآه مصقولة
سليمة .. عدد ٣٤ قطعة فقط لا غير ولم نجد خلاف ذلك
ولعدم وجود .. (نجيب يلتفت لعبد الله) ازاي ما وجدوش
خلاف ذلك ؟ .. بقى ده كل العفش ؟ ..

عبد الله : (يغمز بعينه) أصل أنا كلام في سر جنابك هربت
الباقى .. التنايش الخفيفه ..

نجيب : كنت بالمره هرب العفش كله يا عبيط ..

عبد الله : ازاي أهربه ؟ .. ده يبقى اسمه عزال .. وانا صنعتى هنا
بواب العماره .. أقوم أعزل شقه بحالها من غير علم
صاحبها ؟ .. وأعزل حضرتك فين ؟ ..

نجيب : النهايه .. أهو المحضر هو اللى عزلنا .. (يعاود
القراءة) .. فقط لا غير ولم نجد خلاف ذلك ولعدم
وجود من يقبل الحراسه فقد عينت عبد الله خميس
بواب العمارة حارسا على جميع ما حجز عليه وحذرتة
بالقانون وقبل الحراسة وحددت لمبيع المحجوزات يوم
الاثنين ١٤ أبريل سنة ١٩٣٢ من الساعة ٩ صباحا
لآخر النهار ..

عبد الله : يعنى النهارده ..

نجيب : (يستمر فى القراءة) و حررت هذا المحضر وتركت
للمدين صورة مخاطبًا مع تابعه عبد الله خميس لغيابه
وسلمت له صورة بصفته حارسا ..

عبد الله : وقال لى إن ضاع جنس شىء من اللى مكتوب فى القايمه

أروح أنا في الحديد ..

نجيب : طبعًا ..

عبد الله : لكن أدخنا بقينا العصر ولا فيش حد جه باع

ولا اشترى ! .. يكونوش نسيوا ؟ ..

نجيب : ينسوا ازاي ؟ .. طول بالك دلوقت تتفرج على بهدلتنا

قدام اللي يسوا واللى ما يسواش ! ...

عبد الله : وإيه العمل دلوقت ؟ ..

نجيب : ما فيش عمل بالمره ..

عبد الله : بس لو كانش راح من بسالى ان النهارده ١٤ في

الشهر ! ..

نجيب : يعنى كنت حاتعمل إيه يا سى عبد الله ؟ .. دا حتى

أحسن اللي راح من بالك .. على الأقل علسان

ما نزعلس قبل الهنا بسنه .. فضك بلا وجع دماغ ..

دا انا لو كنت اكدر خاطرى علسان مسائل زى دى

كان زمانى توفيت بقالى ١٥ سنه ومدفون النهارده في

قراة المجاورين (يتجه إلى الجرامفون) اسكت لما

اسمع الأسطوانه المدهشه قبل ما بيجوا يا خذوا

الفونوغراف ! ..

عبد الله : لك حق .. جنابك فرقت .. ما حد واخذ منها
حاجه ا..

(يخرج عبد الله .. نجيب يدير الأسطوانة التي
أدارها في أول الفصل « لجوزفين بيكر » ثم يتحرك
راقصًا على أنغامها في قوة وعدم اكتراث ..)

(فيفي تدخل فجأة بعد لحظة فترى نجيب يرقص
وحده في الحجرة على نغم الأسطوانة فتقف باسمه
مشاهدة .. ويراها نجيب فلا يغير ما هو فيه .. ويظل
يرقص غير حافل بوجودها وتسرف فيفي من حركاته
فتجلس على مقعد أمامه تفرج .. ولا تتالك أحيانا
من الضحك لحركاته الفكاهية .. إلى أن تنتهي
الأسطوانة فيرفع نجيب الإبرة وهو يصفر بفمه ...)

فيفي : (في ابتهاج) مدهش !.. أرجوك تعيد الأسطوانه
دى كان مره ..

نجيب : (ينظر إليها من رأسها إلى حذائها ولا يجيب) ..؟

فيفي : (في امتعاض) بتبص لي كده ليه ؟..

نجيب : شيء جميل خالص !..

فيفي : إيه هو اللي جميل خالص ؟..

- نجيب : أولا دخول حضرتك على طول كده كأنها و كاله من
غير بواب ا..
- فيفى : كنت عايزنى أضرب جرس الخطر ؟.. كان زمانك
دلوقت جوا الغواصه بقالك ٥ دقائق ، فى الحرده ا..
- نجيب : سيادتك مش غلطانه المره دى فى دور سامى ؟..
- فيفى : لأ أبدا .. أنا عارفه ان دى الأبارتمان بتاعتك ..
- نجيب : طيب .. بقى أنا أحب أعرف بسرعه سبب
التشريف ..
- فيفى : اسمع اما اقول لك قبل كل شىء. انت يجب تغير بسرعه
لهجتك دى ، وتكلمنى بسرعه بشكل ألطف من
كده ، وإلا انا وحياة راس ماما أجنسك واوريك
النجوم الضهر ا..
- نجيب : وحياة راس ماما أنا شايف النجوم الضهر والصبح
والعصر وطول النهار .. ومش منتظر سيادتك دلوقت
علشان توريهم لى ا..
- فيفى : ليه بقى ؟.. إيه اللى مزعلك ؟..
- نجيب : فيه ألف سبب وسبب ا..
- فيفى : ومع ذلك أنا دخلت فجأة لقيتك مبسوط بترقص على

- الجرامفون !..
- نجيب : الطير يرقص مذبحا ..
- فيفى : (فى اهتمام) انت متألم من إيه ؟.. أرجوك تقول لى
حالا ..
- نجيب : أقول لك انت !؟..
- فيفى : إيه المانع ؟..
- نجيب : مستحيل !..
- فيفى : مانتش واثق منى ؟..
- نجيب : يا سيدتى العزيزه .. أرجوك ترك الموضوع ده نهائيا
تتكلم فى شىء مفيد إن كان لا بد من الكلام ..
- فيفى : انت بتحب ..
- نجيب : شوقى انت ازاي حاتزعلينى منك وتخليينى ابقى مش
لطيف ودمى يفور وأتكلم كلام فارغ كثير .. وبعد
كده تحلفى ان انا اللى محقوق ..
- فيفى : طيب خلاص .. مش حا اقول حاجه ..
- نجيب : انت كنت جايه علشان إيه ؟..
- فيفى : كنت جايه علشان ..
- نجيب : أفندم ؟..

- فيفى : علشان أوريك الشبكة اللي قدمها لى سامى .. خاتم
عجيب ا.. شوف .. (تريبه الخاتم وهو فى
إصبعها) فص واحد برلنت سوليتير ..
نجيب : عجيبك ؟ ..
فيفى : قوى .. قوى .. حاجه حلوه صحيح .. وذوق جميل
صحيح ..
نجيب : العفو يا فندم ! ..
فيفى : (تنظر إليه فى دهشة) ..؟
نجيب : (يستدرك) قصدى يعنى بالنيابة عن سامى ..
فيفى : (صمت .. تتأمل الخاتم فى أصبعها) سامى غنى
بالتأكيد ..
نجيب : أيوه طبعًا ..
فيفى : هو كان قال لى ..
نجيب : قال لك إيه ؟ ..
فيفى : قال لى إن عنده ٦٠٠٠ جنية فى البنك رايح بينى لى ٣٣
فيللا فى مصر الجديده ..
نجيب : (هازًا رأسه فى تهكم خفى) ضربهم فى ٦ على
طول ! ..

- فیضی : وقال لی ان عنده اطمینان ما اعرفش فین ..
- نجیب : کان ؟ .. طبعاً ..
- فیضی : ویحیی قوی تعرف ؟ ..
- نجیب : عارف ، وانت بتحبیه .. وکتب الکتب امتی
بقی ؟ ..
- فیضی : ما اعرفش .. سامی عایز یکتبه من بکره ..
- نجیب : له حق ...
- فیضی : لکن أنا متردده شویه ..
- نجیب : مالکیش حق ..
- عبد الله : (یدخل) سیدی نجیب بک ..
- نجیب : خیر ..
- عبد الله : (ناظراً إلى وجود فیضی) دا .. أقول ؟ ..
- نجیب : قول .. خد راحتک ..
- عبد الله : المکوجی طالب حسابہ ..
- نجیب : وانت ما عندکش لسان ترد علیه ؟ ..
- عبد الله : ما أمکنیش أبداً .. غلب حماری ویاہ ..
- نجیب : وعایز ضروری تغلیننی أنا کان ویاکم ؟ .. حسابہ
کثیر ؟ ..

- عبد الله : بقى له شهرين ماقبضش أبيض ولا اسود ..
- نجيب : أعوذ بالله .. وكان ساكت ليه لغاية دلوقت ؟ ..
- عبد الله : إنسانيه منه ..
- نجيب : وجرى لها إيه الإنسانيه دى النهارده ؟
- عبد الله : لقي ما فيش منها فايده ..
- نجيب : وإيه اللي تشوفه انت دلوقت ؟ ..
- عبد الله : يجي يحاسبك جنابك ..
- نجيب : (كالمرتاع) يحاسبني ؟ ..
- عبد الله : ما فيش غير كده ..
- نجيب : أنا عملت لك حاجه يا عبد الله ؟ .. زعلتك النهارده في شىء ؟ .. متأثر منى ؟ .. بينك وبينى ضغائن ؟ .. فهمنى اعمل معروف ..
- عبد الله : أنا فاهم .. جنابك تكره الحساب .. لكن ما باليد حيله ..
- نجيب : يا سلام سلم .. الحساب ده نهرب منه ازاي ؟ ..
- عبد الله : حساب المكوجى ؟ ..
- نجيب : الحساب على وجه العموم .. الأرض فيها حساب .. نزل القبر نلقى فيه حساب .. نطلع السما نلاقى فيها (رصاصة في القلب)

- حساب .. ورائنا في كل حته .. ما فيش فايده أبدًا ..
- فيفى : (تضحك ضحكة خفيفة) ؟ ..
- نجيب : روح يا شيخ قول للمكوجي دا يبرد شويه ..
- عبد الله : ما يرضاش يبرد إلا لو قبض ..
- نجيب : (صائخًا) قل له يجي يقبض روحى بقى ، لأنى
لا أملك غيرها النهارده ! .. وتفضل من غير مطرود
يا يواب يا مغفل قبل ما اعوج لك خلقتك باسطوانه
من دول وزى ما ترسى ..
- (نجيب يمسك أسطوانة .. عبد الله يجرى خائفًا ..)
- فيفى : (تكلم ضحكها) ..
- نجيب : شىء يقصر العمر ..
- (يعود إلى قربها ..)
- فيفى : هدى نفسك شويه ..
- نجيب : ما يکنش .. أهو أنا ما يمضيش على ساعه على خير
أبدًا .. لا بد من خبر مزعج ..
- فيفى : يظهر إن ماليتك مرتبكه شويه ..
- نجيب : شويه !؟ .. انت متواضعه قوى ! ..
- فيفى : طيب ما تيجى تفكر فى تنظيم ماليتك ..

- نجيب : ما تعبش نفسك ..
- فيفى : ليه ؟ ..
- نجيب : لأن لو جميع وزراء مالية العالم اجتمعوا فى لوزان وعملوا مؤتمر لتنظيم ماليتى وتسوية ديونى زى مؤتمر نزع السلاح وديون الحرب ، أؤكد لك انهم يمكن ينجحوا فى نزع السلاح وديون الحرب ولا ينجحوش فى مسألتى .. عاوزه إيه بقى أكثر من كده ! ..
- فيفى : للدرجة دى ؟ ..
- نجيب : دى مسأله مش محتاجه لمناقشه ..
- فيفى : ليه ماهيتك كام ؟ .. ولو ان ده تطفل منى .. لكن أنا مهتمه وأحب اجرب يمكن أنجح أحسن من مؤتمر لوزان ..
- نجيب : ماهيتى خمسين جنيه فى الشهر اسما .. لكن اللى بيوصل فى يدى ٤٤ جنيه و ٦٠٠ مليم بعد الاحتياطى والمعاش ورسم الدمغة وخلافة من تماحيك آخر الزمن ! ..
- فيفى : وبتصرف منهم كام فى الشهر ؟ ..
- نجيب : باصرف منهم حوالى ١٠٠ جنيه فى الشهر ! ..

فیفی : (فی دهشة) ازای ده ؟ .. ایرادك خمسين و تصرف
.. ۱۰۰ ؟

نجیب : باستمرار من نهار ربنا ما نخلقنی .. علشان كسده
المسألة عویصه ولا یمكنش حلها إلا إذا اخترعوا
حساب جدید یمشی بالمقسوب غیر الحساب اللى
أوجدہ فیثاغورث ..

فیفی : و تصرف ال ۱۰۰ جنيہ ازای فی الشهر ؟ ..

نجیب : ما اقدرش اقول لك .. أنا لما یكون فی جیبی فلوس
ما احترامهاش .. أصرفها بعقل ومن غیر عقل ..
یمكن ألاقى شحات فی السكه أعطیه ورقه بجنيه لأنه
قال كلمه عجبتنی ..

فیفی : أنت مدهش ا..

نجیب : أنا إنسان مكتوب علیه انه یعیش بشكل مخصوص فی
الحیاه ، ویستحیل تتغیر حیاته ، یستحیل ینتظم
ویستحیل یعیش یوم فی أمان الله زی بقية مخلیق الله
الطیبین ..

فیفی : حیاه بوهمیہ غریبه ا..

نجیب : ارتباك مزمن وعسر هضم اقتصادى وفقر دم مالى

- ماهش علاج ..
فيفى : انت غلطان .. أفكر ان فيه علاج ..
نجيب : إيه هو من فضلك ؟ ..
فيفى : لو تتزوج واحده تفهمك ويكون عندها فلوس ..
نجيب : ويكون عندها (باكار) ..
فيفى : تمام كده ..
نجيب : علشان يباع البكار .. ونغرق احنا الاتنين فى نهار ! ..
فيفى : (باسمه) وماله ؟ ..
نجيب : أظن واحد زى ما انخلقش علشان زواج ..
فيفى : تفتكر كده ؟ ..
(جرس الباب يدق بشده ...)
نجيب : جرس الخطر ! .. (يتحرك ويسرع إلى المنضدة ويرفع غطاء الصندوق ويلتفت إلى فيفى) عن إذتك دقيقة واحده ..
فيفى : حاتدخل الفواصة ؟ .. دى مش طريقه عمليه أبدًا ..
نجيب : دا اختراع ألمانى ! .. مستحيل أقدر أبص فى سحنة مطالب .. أورو فوار مؤقتا ..

- (يغلق على نفسه الصندوق)
- عبد الله : (من الخارج) يا حضرة المحضر باقول لك نجيب ييه
مش موجود ..
- المحضر : (يدخل وخلفه خواجه وشيخ القسم وعبد الله)
وجود المدين وعدم وجوده ما يهمنيش .. (لشيخ
القسم) نادى الشياطين ..
- شيخ القسم : (يتجه إلى الباب وينادى) اطلع يا شيال انت
وهو ! ..
- المحضر : قبل ما نشرع فى التنفيذ أنبه عليك يا عبد الله خميس
بصفتك تابع للمدين ومقيم معه فى معيشته واحده بأن
تدفع لدينا حالا مبلغ ٥٦٨٠ قرشا واحنا نوقف
الإجراءات .. تدفع والا لأ ؟ ..
- عبد الله : لأ .. منين ؟ .. هو احنا معانا خمسه مليم ..
- الخواجه : (وهو يتكلم بلغة واضحة سليمة مع عجمة خفيفة)
أنا عندى تفويض من الداين الخواجه جبران لو تدفع
أربعين جنيه يصير التنازل عن الحجز والبيع ..
- عبد الله : (ينظر إليه ولا يعنى بالرد عليه ، ويلتفت للشياطين)
شيل شيل يا شيال ..

المحضر : تابع المدين أجاب بعدم السداد وشرعنا في التنفيذ ..
تعال يا عبد الله خميس بصفتك حارس للمنقولات قدم
لنا المحجوز عليه ..

عبد الله : آهو عندك ..

المحضر : (محتدًا) آهو عندى ازاي يا قليل الأدب يا حمار ! ..
انت مش عارف أنا مين ؟ .. فتح عينك كويس
وكلمنى باحترام .. أنا حامى القانون وممثل سلطة
الحكومة ، انت فاهم إيه ! .. وشرف مركزى أعتبرك
ميدد وأحرر ضدك فى الحال محضر تبديد وتعدي
وأحط الحديد فى إيديك وأضيع مستقبلك ..

عبد الله : لأ .. مفيش لزوم .. أنا غلطت والشفاعه لشيخ
التمن ..

شيخ القسم : استسمع حضرة المحضر وابقى نخذ بالك يا ابنى
الا تنضر (للمحضر) أصله مش واخذ على مقابلة
الحكام ..

المحضر : (فى عظمة) الحق علينا اللي عيناه حارس .. ضيع
وقتنا واحنا لسه وراتنا بيوع وحجوزات وانتقالات ..
عبد الله : يا جناب المحضر العفش تمام ماضاعش منه قشايه ..

المحضر : (يعطى المحضر لشيخ القسم) خد يا شيخ القسم
صورة محضر الحجز واجرد وطابق القايمه (يجلس على
مقعد) إلا احنا تعبانين من كثرة الأعمال .. اتفضل
استريح يا خواجه يوسف ..

الخواجه يوسف : (ينظر إلى فيفى الجالسة المتفرجة في ابتسام)
بردون يا مدام ..

فيفى : (للخواجه) من فضلك ما يمكنش تأجيل البيع لبكره
واحنا ندفع كل الفلوس ؟ ..

المحضر : ما يمكنش يا هاتم ، تأجيل البيع يتكلف مصاريف
ويستدعى إعادة اللصق والنشر وكافة الإجراءات ،
ودى مما طلات احنا عارفينها ..

فيفى : أنا متأسفة .. ما فيش فى شنظتى ٤٠ جنيهه
دلوقت .. إنما أقدر ..

شيخ القسم : (يقرأ ببطء فى الورقة) : « عدد ١ تريزة وسط
خشب أبيض بأربعة أرجل مستعمله سليمه .. »
فين ؟ .. (يلتفت حوله) مش موجوده ..

عبد الله : دى فى المطبخ .. مش موجوده ازاي ؟ .. اجرد الأوده
دى اللى انت فيها الأول تلاقى كل شىء تمام ..

المحضر : أيوه أجرد أوده أوده ، والشياطين تنزل أول بأول ،
والناقص يتحرر به محضر ..

شيخ القسم : (يقرأ) ٥ عدد ٦ فوتيل وكراسي وكتبه .. عدد ٣
طوله وفونوغراف إلخ .. (ينظر بعينه مطابقا)
الأوده دى تمام انزل بها يا شيال انت وهوه .

عبد الله : (لشيخ القسم) حا تاخذ العفش على فين ؟ ..

الشيخ : على باب الشارع يترص حته حته علشان الناس تيجي
على ضرب الجرس تدخل المزاد ..

عبد الله : (يهز رأسه آسفاً) يا فضيحة جنابك يا سى نجيب
بك ! ..

(ينهمك الشياطين فى زحزحة الكراسي وتغير نظام
الصالون وينهض المحضر والحواجة يوسف ليدعا
الشياطين تنقل مقعديهما ، وتظل فينى جالسة إلى أن
يدنو منها شيال يريد نقل مقعدها ...)

المحضر : تفضللى يا هاتم الناحيه دى .. فى الرواقه ..

(وتقف بجوار المنضدة التي فيها نجيب .. ولكن
لا يلبث أن يأتي الشياطين لنقل المنضدة فتصبح فينى
ممانعة)

فيفى : (صائحة) انتظر يا شيال .. انت واخذ الصندوق ده
على فين ؟ ..

المحضر : دا من ضمن المحجوزات يا هانم ..

فيفى : مستحيل ا .. ده فيه جوه حاجات غير محجوز عليها
طبعا ؟ ..

المحضر : محجوز عليه يا هانم .. من فضلك ما تعرقليش
التنفيذ .. شيل يا شيال ..

فيفى : (صائحة) مستحيل .. مش معقول .. لازم تسبب
الصندوق ده ..

المحضر : ما يمكنش يا هانم ..

فيفى : أنا مستحيل أسمح بنقله ..

المحضر : (فى غلظة) شيل شيل يا شيال .. بلاش عطله ..

الخواجة : تقدرى يا مدام تدفعى كام من أصل المبلغ ؟ ..

فيفى : أنا متأسفه ما فيش معايا النهارده فلوس كفايه

(فجأة) اسمع لما أقول لك : أنا أقدر أعطيك ده

(تخلع الخاتم من إصبعها) إيه رأيك ؟ .. ثمنه بالتأكيد

أكثر من مبلغك ا ..

الخواجة : (فى دهشة يفحص الخاتم) خاتم ألماس (يخرج من

جيبه عويبة لما يستعملها الجواهر جيه للفحص ،
ويضعها على عينه وينظر إلى الخاتم (طبعًا دا يساوى
كثير ..

نجيب : (فجأة يرفع الغطاء ويظهر صاحبها بين دهشة
وارتياح الجميع) إنت مجنونه؟! .. هات الخاتم ده يا
خواجه! ..

المحضر : (بعد لحظة وجوم) بسم الله الرحمن الرحيم .. طلع
منين ده؟! ..

شيخ القسم : دا لازم المدين ..

(المحضر والشيخ يستعلمان من عبد الله الذى يشرح
لهما همسًا)

نجيب : الخاتم .. هات الخاتم يا خواجه اعمل معروف ..

الخواجه : بردون يايبه! ..

(ينظر إلى فيفى التى سلمت إليه الخاتم ...)

نجيب : ما فيش بردون ..

فيفى : اسكت يا نجيب مالكش دعوى! .. نخلي الخاتم معاك

يا خواجه ..

نجيب : إزاي الكلام ده؟! .. دا خاتم ألماس مش لعب ..

- فيفى : عارفه انه خاتم ألماس مش لعب .. وعاوزه أتصرف فيه .. أرميه البحر .. الخاتم بتاعى أنا .. انت شريكى ! ...
- نجيب : بتاعك ازاي ؟ ..
- فيفى : يا قول لك اسكت يا نجيب .. انت ما لكش دعوى ! ..
- نجيب : ماليش دعوى ازاي ؟ .. أمال مين اللي له دعوى ؟ .. دا شىء يجنن ا .. هات الخاتم يا خواجه ..
- فيفى : ما تسمعش كلامه ياخواجه .. زى انا ما قلت لك خلى الخاتم معاك وبكره أجيب لك مبلغك ، على شرط توقف البيع حالا ..
- الخواجه : بكل ممنونيه يا هاتم .. يا حضره أنا طالب إيقاف البيع ..
- المحضر : انزل يا شيال انت وهو (يتناول ورقة ويكتب) محضر إيقاف (ثم يكتب فى صمت ويقول) أوقفنا الإجراءات كطلب وكيل الدايين ، تعال امضى يا خواجه يوسف ..
- الخواجه : (يوقع على ورقة المحضر ثم يخرج ورقة من جيبه

ويكتب إيصالاً يقدمه ليفي (مرسى يا هاتم .. آدى
وصل بخاتم ألماس فص واحد برلنت سوليتير وزن ٨
قراريط ..

نجيب : (بسرعة) تسعه ونصف ..

(فيفي تنظر إليه والجميع في استغراب فيستدرك
بسرعه)

أيوه .. أنا عارف من سامى ..

يوسف : (وهو يكتب) تسعة قراريط ونص .. (يسلمها
الورقة) أورفوار .. أورفوار يا نجيب بك ..

(يخرج)

نجيب : (يضرب أحماسًا لأسداس) أما يا ناس دى
عجيبه !..

المحضر : نهار كم سعيد يا حضرات ..

(يخرج خلف الخواجة يوسف ومعه شيخ القسم)

عبد الله : (خارجاً كذلك خلف المحضر) اخلى طرفى يا جناب

المحضر .. الحكومة حرسنتى على العفش وطلع لله

الحمد سليم (يخرج مع الجميع)

فيفى : (وحدها مع نجيب) عجيبه ليه بقى !؟ .. حاجه

طبيعته خالص .. كنت منتظرا اني اسيبهم يا خدوك في
الصندوق ويبيعوا فيك ويشترؤا كأنك محجوز عليك
انت كان ضمن الموييليا ؟ ..

نجيب : وماله ؟ .. لكن الخاتم ..

فيفى : في داهيه الخاتم .. إيه يعنى الخاتم ؟ .. أدفعه فدييه
بصفتى من الخلفاء أحسن ما كانوا يصادروا الغواصه
باللى فيها ؟ ..

نجيب : غواصة إيه ؟ .. إحنا خسرنا الحرب ؟ ..

فيفى : (ضاحكة) أبدا .. بالعكس ..

نجيب : إيه اللى كسبناه ؟ ..

فيفى : كل حاجه .. أنا مندهشه ليه تهتم بالخاتم بالشكل
دا ؟ ..

نجيب : بس علشان ده .. شبكة سامى ..

فيفى : وإيه يعنى ؟ ..

نجيب : طيب ورايحه تقولى لسامى إيه لو سألك النهارده على
الخاتم ؟ ..

فيفى : أقول له على اللى حصل ..

نجيب : ما يصدقش ..

- فیفی : جایز ما یصدقش .. لأن سامی مش زیك أو زبی ..
دی عقلیته ما تقدرش تفهم بسهولة التصرفات دی ..
- نجیب : لأنه رجل عاقل موزون ..
- فیفی : زیاده عن اللزوم .. ولذلك أنا رایحه أکلمه کلام
شدید ..
- نجیب : حاتقولی له إیه ؟ ..
- فیفی : حا اقول له أنا مندهشه ازای واحد صاحبك ساکن
معاک فی بیت واحد ینحجز علیه وانت ساکت ؟ ..
- نجیب : حا یعمل لی إیه ؟ .. کل واحد عنده ظروفه ..
- فیفی : اسمع یا نجیب ، انت إما مغفل — ما تأخذنیش —
وإما عاوز تدافع قدامی عن سامی دفساع
ما یتحقوش .. انت بالتأکید تفهم سامی أكثر
منی .. لأنی فهمت طبیعته کویس قوی من مسده
بسیطه ..
- نجیب : أنا أشهد لك دائما بالذكاء .. إیه بقی اللى فهمتیه ؟ ..
- فیفی : فهمت أنه رجل عاقل زی ما قلت انت تمام ، ویوزن
کل حاجه فی الدنيا زی طبیعة کل شخص مادی

- شويه ..
- نجيب : إيه كان ؟! ..
- فيفى : أنا أفهم كويس الناس المدهونين بويه .. سامى مدهون بويه كويس قوى .
- نجيب : كل الناس كدا ..
- فيفى : انت لأ ..
- نجيب : ليه بقى ؟ .. أنا يعنى اللي خشب أبيض زى طرابيزة الوسط ؟ .. المسألة ان ظروفى غير ظروف سامى .. وأنا لو كنت لقيت فيه فايده كان زمانى ضربت نفسى بويه بالزيت .. ثلاث .. أربع وشاش ...
- فيفى : ما افكرش ..
- نجيب : على كل حال .. بعد الزواج فى إمكانك تخلقى سامى خلقه جديده ..
- فيفى : أنا مش عاوزه أخلقه ولا أسخطه ..
- نجيب : عاجبك زى ما هو كده ما فيش بأس ..
- فيفى : أرجوك .. بس .. كفايه .. احنا تكلمنا عن سامى زياده عن اللزوم .. كلمنى عن موضوع تالى ..
- كلمنى عن نفسك ..

- نجيب : أكلمك عن نفسى أقول إيه ؟ .. (يشير إلى الصالون المبعثر) آدى انت على يدك شايفه كل حاجه ..
- فيفى : حقا .. صحيح انت الشخص الوحيد اللي أقدر أقول انه ما حاولش لحظه إنه يغشنى ..
- نجيب : انت لطيفه قوى معاينه النهارده من غير مناسبه ! .. بس ضيعت الخاتم ، لكن بقى الأمر لله ! .. الكلام دلوقت أصبح ما يجيش منه ..
- فيفى : مالكش دعوى بالخاتم .. اسمع يا نجيب ! .. انت نسيت الطب الروحاني والسحر العجيب ؟ ..
- نجيب : مش فاهم غرضك ..
- فيفى : انت مش تعرف تقرالى اللي فى ضميرى ؟ ..
- نجيب : أبداً ..
- فيفى : ازاي ؟ .. مش فاكر لما تقابلنا أول مره فى العياده ؟ ..
- نجيب : آه ! .. لأ .. أرجوك تنسى المقابله دى واللى حصل فيها ..
- فيفى : انت عبيط ! .. أنساها ازاي ؟ .. انت ما تقدرش تطلب منى طلب زى ده ...
- نجيب : انت حره .. لكن أنا أنسى زى ما يعجبنى ..
- (رصاصه فى القلب)

- فیفی : لأ .. ما تنساش يا نجيب .. أرجوك ا..
- نجيب : عجایب ا.. انت كان عاوزه تحجزى على ذاكرتى ا..
- فیفی : أيوه عاوزه أحجز ..
- نجيب : (بعد لحظة) وایه بقى اللى يهيك من كدا ؟ ..
- فیفی : ما تعرفش إيه اللى يهمنى ؟ ..
- نجيب : أبداً ..
- فیفی : ما تقدرش تقراالى اللى فى قلبى وضميرى دلوقت ؟ ..
- نجيب : فى ضميرك إنك قاعده تمكرى على وتلعبى بمهاره مخيفه ..
- فیفی : (باسمه) كذاب ا..
- نجيب : (مستمرا) فى ضميرك إنك عاوزة ترجعى فى نفسى أمل بسيط من غير لزوم ، علشان فى الآخر أقع من سابع سما لسابع أرض ، زى الدورق الفخار اللى يقع من فوق السطح على الأسفلت ..
- فیفی : كذاب ..
- نجيب : فى ضميرك إنك بتحبى شخص كويس قوى ، وهو يحبك كثير قوى .

- فیفی : والشخص ده موجود هنا فى الأوده دى دلوقت ؟ ..
- نجيب : بالطبع لأ ..
- فیفی : كذاب ..
- نجيب : (فى دهشة) كذاب !؟ ..
- فیفی : (فى إخلاص) من غير شك كذاب لو تفتكر ان الشخص ده مش موجود هنا دلوقت قدامى ! ..
- نجيب : (ينظر إليها فى صمت وكأنه يغالب نفسه ثم يطرق مفكرا) ..
- فیفی : (تطرق فى انتظار جوابه بصبر نافذ ثم ترفع رأسها كى تقول شيئاً لإخراجه من صمته) ..
- نجيب : (يرفع رأسه أخيراً إليها) متشكر على التصريح الخطير ده ! ..
- فیفی : (فى امتعاض) بس كده !؟ ..
- نجيب : (فى عزم) بس كده ! .
- فیفی : دا كل اللى تقدر تقوله !؟ ..
- نجيب : كفايه ..
- فیفی : (فى يأس) أنا كنت منتظره انت حاتقول كلام كثير ! ..

نجيب : متأسف قوى .. أنا صحيح فى شدة التأثير من
تصريحك ، لكن بقى ..

فيفى : لكن بقى إيه ؟ ..

نجيب : لكن بقى .. إيه قيمته دلوقت ؟ .. تفتكرى حايغير إيه
من الموقف كله ..

فيفى : فهمت قصدك .. انت جنتلمان زياده عن اللزوم ..

نجيب : أرجوك تطلعى فوق لخطيبك وتسحبنى تصريحك ..

فيفى : مش عاوز بأى حال من الأحوال تقبله منى ؟ ..

نجيب : فات الأوان ..!

فيفى : (بعد لحظة) ضميرك مش قادر يسمح لك إنك تاخذ

من صديقك خطيبته .. مهما كانت الظروف مش

دى كل المشكله اللى قايمه فى نفسك ؟ ..

نجيب : (مطرقا كاشخاطب لنفسه) أبوه مهما كانت الظروف ..

فيفى : (فى تأثير) نجيب ..

نجيب : (فى عزم) الوداع يا فيفى ..!

(يتناول يديها ويضغط عليهما فى حرارة

وإخلاص .. ثم يشيعها إلى باب الشقة ، ثم يعود

وحيدًا وهو مطرق يمشى فى بطاء ، ويقف فى وسط

القاعة بلا حراك لحظة ، ثم يرفع رأسه فجأة
ويقول : (

نجيب : « وناوش زواج ؟ .. أنا رد حجوزات ا .. »

(ثم يتجه إلى موضع الجراففون ويدير الأسطوانة
ويصفى إليها قليلا شارد الفكر ساهما ثم يتحرك فجأة
واقصا على أنغامها كأنما يريد أن يقنع نفسه بأن حياته
هي دائما حياته .. وأنه لم يتغير في حياته شيء ..)



رصاصة في القلب

في السينما

- . كتبت رصاصة في القلب عام ١٩٣١ .
- . وأخرجت في فيلم سينمائي عام ١٩٤٤ .
- . بطولة وألحان وغناء الموسيقار محمد عبد الوهاب .
- . وإخراج الأستاذ محمد كريم .



كلمة المؤلف

« لا شأن لي بالسينما » ! كان هذا ردى دائما على كل من حاول إغرائى بإخراج رواية لي على الستار . ولعلى قلت ذلك أيضا لصديقى الأستاذ محمد عبد الوهاب . ولكنه جعل يهون على الأمر ، حتى وقعت أخيرا بين حياثل أو « شرائط » هذا الفن العجيب ..

ولست أدري بعد نتيجة هذه « الوقعة » . فأنا قد سبق لي أن أبديت رأى في الفن السينمائى ، وقلت إن الكاتب غير محتاج إلى الالتجاء إليه .. لأن القلم كامل بنفسه ، لا ينبغى له أن يستند إلى أداة أخرى تعينه على التعبير . وإن عالم الكتابة مستقل بصوره ومخلوقاته ووسائل إخراجها ، إذ الكاتب فى الحقيقة ليس هو الذى يرصف جملا وينسق عبارات ، إنما هو ذلك الذى يصنع عالما زاخرا بالأشخاص التى تحيا وتشعر وتسعى دون أن يحتاج فى إنشاء هذا العالم إلى غير قلمه وحده ..

هذا الرأى لم يزل قائما عندى ما تغير .. ولكن الذى تغير هو شعور الكاتب السجين مع مخلوقاته فى صفحاته ، المكبل معها طويلا فى أغلال سطوره .. مثل هذا الكاتب يجد من الأنانية أحيانا أن يحرم أشخاصه حق الانطلاق لحظة خارج جدران كتبه ، لتحيا بعيدة عن

الإطار الذى اعتادته واعتاده الناس ، نابضة من جديد .. فى إطار آخر من صنع أيدٍ جديدة . هذا الخوف من الأثرة هو الذى حملنى على أن أتيج لأشخاص « رصاصة فى القلب » مجالا آخر تتحرك فيه غير مجال الورق ..

وبعد فإني أرجو أن أكون على صواب . ولعل ما يدعونى إلى الرجاء هو حسن اختيار من وضعت فى أيديهم مصير « أشخاصى » ، وما من أحد يشك فى أنها أيدٍ معروفة فى عملها بالصبر والكد والاجتهاد . وانه لمن الظلم أن أسهو عن ذكر تلك الجهود المضنية التى بذلها الأستاذ عبد الوهاب والمخرج الأستاذ كريم ومن عاونوهما خلال عامين طويلين لإعداد هذا العمل الذى يشاهده الناس اليوم فى ساعتين . فإذا ظفروا بعد ذلك بنجاح فهو حقهم وجزاؤهم وثمرة مجهودهم وخدمهم ..

توفيق الحكيم

١٩٤٤

كلمة المخرج

إذا أتم الإنسان عملاً من أعماله وفق مرامه وهواه فإنه يشعر بإحساسين .. إحساس الغبطة بتمام عمله . وإحساس الأمل في نجاح ما قام به واستفادة الجمهور منه .

ولكنني وقد أتممت فيلم (رصاصة في القلب) وهو أول إنتاج للسينما من كاتبنا الكبير توفيق الحكيم أحس غبطين ، وأستشعر أملين .

فغبطتي بتمام عملي تصاحبها سعادة أخرى أتاحتها لي من شاركوني في مهمتي ممن لم أكن حظيت قبل اليوم بمشاركتهم ، فقد كان هذا الفيلم فرصة طيبة لي عرفنتني بإخوان أذكياؤ أكفاء سررت بهم ولمست فيهم من الكفاية والمقدرة ما ملأني فخراً بزمالتهم وسعادة بتوفيق الله في معرفتهم .

وأما أملى في النجاح فقد تضاعف بمقدار ثقتي بقوة الزملاء وبمقدار ما عرفت فيهم من الإخلاص للعمل والفناء فيه .

ولكن تحقق هذا الأمل فلا أشك في أن لهم في تحقيقه النصيب الأوفر
واليد العليا وما كنت معهم إلا واحدًا منهم يدفعني إخلاصهم إلى
الإخلاص وتحفزني كفاءتهم إلى الاجتهاد .
فلهم مني خالص الشكر والتقدير ، وأتمنى لهم شكر الجمهور
وتقديره .

محمد كريم

١٩٤٤

أسرة فيلم رصاصة في القلب (١٩٤٤)

التأليف والحوار	: توفيق الحكيم
السيناريو والإخراج	: محمد كريم
الغناء والموسيقى والبطولة	: محمد عبد الوهاب
رئيس الفرقة الموسيقية	: عزيز صادق
كلمات الأغاني	:
(١) إيليا أبو ماضي	
(٢) أحمد رامى	
(٣) حسين السيد	
(٤) مأمون الشناوى	
التصوير	: محمد عبد العظيم
أخذت المناظر وتم طبعها وتحميضها باستوديو مصر. عبد الله	
ياقوت — عبد الحميد أمين عبد المنعم — أنور على	
الصوت	:
للأغاني	: مصطفى والى .
للحوار	: قدرى محمود .
	: إميل عطايا وحلمى رسمى :
	. مساعدان .

- كامل حافظ : آلات العرض .
الديكور : ولى الدين ساح .
الماكياج : حلمى رفة .
الريجسير : قاسم وجدى .
المونتاج : إحسان فرغلى .

الممثلون

محمد عبد الوهاب	: في دور «محسن» [«نجيب» في النص الأصلي]
راقية إبراهيم	: في دور « فيفي »
سراج منير	: في دور « دكتور سامي »
علي الكسار	: في دور « عبد الله البواب »
عبد الوارث عسر	: في دور « أبو العزائم » الشحاذ .
فاتن حمامة	: في دور « نجوى »
بشارة واكيم	: في دور « عبده بك »
إلهام حسين	: في دور « طماطم »
عبد القدوس	: في دور « خورشيد باشا »
زينب صدقي	: في دور أم « فيفي »
ليلى فوزى	: في دور « حسنية »
سيد سليمان	: في دور « مارسيل »
حسن كامل	: في دور « المحضر »
فيليب كمال	: في دور « الخواجه »



أغاني الموسيقى
محمد عبد الوهاب

(رصاصة في القلب)

كلمات « إيليا أبو ماضي »

لست أدري

جئت ، لا أعلم من أين ولكنني أتيت
ولقد أبصرت أمامي طريقًا فمشيت
وسأبقى سائرًا إن شئت هذا أم أبيت
كيف جئت ؟ كيف أبصرت طريقتي ؟..

لست أدري

أنا لا أذكر شيئًا من حياتي الماضية
أنا لا أعلم شيئًا من حياتي الآتية
لي ذات غير أني لست أدري ما هي
فمتى تعرف ذاتي كمنه ذاتي ؟

لست أدري

أين ضحكى وبكائى وأنا طفل صغير
أين جهلى ومراحى وأنا غض غريب
كلها ضاعت ولكن كيف ضاعت

لست أدري

كلمات « أحمد رامى »

مشغول بغيرى

مشغول بغيرى وحيته يا ريتى ما كنت رأيتيه
صورت جنة من الأحلام وهـببتها غصن ودادى
وسبت قلبى الشارد هام فى جنة الحب ينسأدى
يطلب أليفه يسعد بطيفه
ويقضى عمره راضى بهواه
وفضلت أتمنى أعشق واتهنسى
أتسالى طيرى لايف بغيرى

وانت يا قلبى

حبك وحبى

للى لقيتسه يسحب غيرى
مسكين يا قلبى حيران فى حبى
لا انت حانقدر يوم تسلاه وتداوى جرحك بالنسيان
ولاح تسرض تبسوح بهواه بعد اللى نابلك م الحرمان
مسكين يا قلبى مظلوم فى حبى

للى باحبه ويحب غيرى

الميه

الميه تروى العطشان
يا جماها والحوض مليان
وان طال بك ليل الأوهام
صدقنى حد لك حمام
يا محير قلبك وعينيك
الدنيا بتضحك حواليك
وتطفى نار الحيران
وانا عايم على وش الميه
وعيونك مش قادره تنام
يجى نومك والليله هنيه
ليه تشكى والحق عليك
اتمتع واطحك للميه

حنانك يا ربي

حنانك يا ربي
وليه اجنى على روحي
قضيت عمري وانا وحدي
ولما الحظ وافساني
ضنيت روحي بسكتاني
وكان لي قلب عايش بيه
ضحيت قلبي وضنيت حالي
ورضيت بحكم الزمن
قلبي مسلاه الشجن

أنا بايدي كويت قلبي
وأحرمها نسيم حبي
منيش لاق حبيب جنبي
وشفت اللي هواه يسبي
وكان الذنب مش ذنبي
صبحت أبكي على قلبي
وازداد حبي ضحيت مالي
وشربت نار الأسيه
والدنيا قضيت علي

كلمات « حسين السيد »

حوار غنائى

- محسن : حكيم عيون افهم فى العين
وافهم كان فى رموش العين
أعرف هواهم ساكن فى
وأعرف دواهم يعجى منين
قاسيت كتير منهم وقربت كتير عنهم
فيفى : اسمع يا دكتور . أنا أعرف إن الألم يعجى من
عصب الضرس لما الواحد ياكل حاجه ساقعه .
محسن : علشان تحرمى تاكلى جلاس
وتدوى فى قلوب الناس
فيفى : وعرفت منين ؟
محسن : ما تعرفيش إني أقدر أقرأ أفكارك
ومن عينيك أقدر أقول لك كل أسرارك
فيفى : حكيم روحانى حضرتك .. ؟
طيب إقرالى اللي فى قلبى واحكى لى عليه

- محسن : اللى مكتوب فيه بيخوف ما اقدرش احكيه
فيفى : بيخوف مين ؟
محسن : بيخوفنى .
فيفى : انت كل حاجة تحشر نفسك فيها حتى قلبى
محسن : يا ريتنى صحيح اقدر اكشف
 قلبك واسأله عالى فى بالى
فيفى : تسأله عن ايه ؟
محسن : عايز اعرف
 إن كان مشغول والأ خالى
فيفى : شىء ما يهكمش
محسن : ما يهمنى ايش ازاي!!
فيفى : طب ما تعيطشى
محسن : عندى سؤال لو تسمحنى . اقدر أقولها لك ؟
فيفى : قوى
محسن : فيه يا ترى شخص يهكم
 شاغلك ومشغول به قلبك ؟
فيفى :
محسن : والشخص ده موجود هنا .. ؟
فيفى :

- محسن : یعنی انت عارفاه مش کدا .. ؟
- فیفی :
- محسن : والشخص ده شایفاه دلوقت قدامک ؟
- فیفی : بالطبیع لأ
- زعلت منی وإلا إیه
- محسن : أبداً وحازعل منك لیه
- دلوقت بس صدقتک خدعونی قلبی وعینیه
- واللی انکتب جوا قلبک أتاریه لغيری مش لی

أحبه مهما أشوف منه

أحبه مهما أشوف منه ومهما الناس قالت عنه
أحبه

شغلنسى والأمل خاننسى وحر كل أفكسارى
سقانى الكاس وراح فاتنسى لا انا سكران ولا دارى
بيظلم فى وبجبه

وقاسى على وبجبه

واحبه مهما أشوف منه ومهما الناس تقول عنه
أحبه

شهور وايتام بيظلمنسى وقلبى راضى بقليلسه
لا قادر هو يفهمنى ولا قادر أنا أحكى له
جنيت على قلبى وبجبه
وضحيت حبنى وبجبه

واحبه مهما أشوف منه ومهما الناس قالت عنه
أحبه ...

قابلنسى صدفه وقابلتسه وروحى سلمت قبلى
ياريتنسى كنت ما شفتسه ما نابنى غير ضياع أملى
واحبه مهما أشوف منه ومهما الناس قالت عنه
أحبه

حوار غنائی

- محسن : حاقولك إيه عن أحوالی بعد اللى شفتيه بعنيك
آدى حياتى وآدى حالى خانجى إيه تانى عليك
- فيفى : وازاى تعيش بالشكل ده ؟
- محسن : ما اقدرش اعيش إلا كسدا
- فيفى : فاكر لما شفنا بعض أول مرة ..
- محسن : أيوه فاكر .. لأ مش فاكر شىء بالمره
- فيفى : كان حلم جميل
- محسن : واديني لسه عايش فيه
- فيفى : كان حلم جميل
- محسن : نسيته وانتِ كان انسيه
- فيفى : إنساه لوحدك أما أنا
عمرى ما أنسى اللى مضى
عندى سؤال
- محسن : اتفضلى
- فيفى : تسمح تجاوبنى ؟
- محسن : قسوى

- فیفی : تقدر تقرالى اللى فى قلبى وتقوللى عليه ؟
محسن : مكتوب فيه واحد يبجك وانت تحبسه
فیفی : والشخص ده موجود هنا ؟
محسن : بالطبع لأ
فیفی : إنت كذاب
دائمًا تترفزنى كذا
محسن : ممكن يكون واقف عالباب
فیفی : دا شايفنى وانا شايفاه وفاهنسى وانا فاهماه
من غير ما تقوللى عذرك أنا شفته
قلبك مختار بين صاحبك وخطيبته
لكن يا محسن أنا خايفه تكون بسببى متألم
محسن : بالعكس .. انا أشكرك على الألم ده .. انت فاكره
الجلاس اللى كلتها .. مش كانت بارده ؟
حياتى كانت كده ، وفاكره لما دابت من حرارة
شفايفك ، حياتى من ساعتها بقت كده .
أنا مندهش ازاي كنت عايش فى الدنيا مسن غير
ما أعرف حرارة الألم .
ولقيتنسى عايش بين قلبين
اتماهدوا من قلبى الاتنين

مارضيتش افرق بين أمسين
واكون سبب في عذاب حبيبين
ضحيت بفراسي ونصيبى
واخترت آلامى وتعذيبى
وآلامى هى اللى حاتففضل
من حبى بعد الحرمان
واللى ما سهرش ولا اتسالم
عمره ما يتسمى إنسان

محسن : الوداع يا فيفى .
فيفى : الوداع يا محسن .

الجلاس

يا جلاس الشوق فاض لى وطول
يا ما دبت معاك وانسا مش دارى
يا مسبب نساى مسن الأول
دلوقت بس طفقت نساى
يا جلاس من ساعة ما شفتك
دبت فى شفايفها بغير منك
دلوقت انسا اللى حانوب عنك
واكشف عن حبنى المداى
يا مسبب نساى مسن الأول
دلوقت بس طفقت نساى
اللى يبحب ومش طايل أنا عندى دواه
الجلاس الجلاس ...
واللى له بخت لكن مايل فى إيدته هنسأه
الجلاس الجلاس ...

دانا ياما الشوق فاض لى وطول وانت اللى طفقت يا جلاس نارى
يا مسبب نارى مسن الأول دلوقت أنا اللى حاخذ نساى

« كلمات مأمون الشناوى »

انس الدنيا

انس الدنيا وريح بسالك
واوع تفكر فى اللى جسرالك
انس الدنيا
يا لى دموعك لحبايبك
قل لى ابتسامتك تبقى لى
لوع الغرام يشغل قلبك
دا لسه فيه فى العمر سنين
مين الهنسا يقسى قصاده
وتشغله عنه همومه
يا عاشق الليل لسواده
فايت لى عشق نجومه
ليه تشغل بالك مين يرحم حالك
كل اللى احببه حوايته
مين زيسى فى الدنيا اتهنسى

حتى النجوم ملك إيديسه
آدى النسيم آدى الجنسة
دوق الجمال وامتسع بيسه
من قبل ما يدبل ويزول
واوع يفسوت يسوم تحزن فيه
واسهر ده بكره النوم حايطول
ليه تشغل بالك مين يرحم حالك

رقم الإيداع : ٨٨ / ٣٩٥٢

الترقيم الدولي : ٨ - ٠٤٠٩ - ١١ - ٩٧٧





مكتبة جامعة القاهرة
Bibliothèque Université du Caire



0294016

الثمان ٤٠٠ قرش

دار مصر للطباعة
بيروت - جدة - القاهرة - الإسكندرية

To: www.al-mostafa.com